

## **Venuwa'ata Yamumuna MAKI gi'etoladina amanadi**

Bana Maki, ana egana velugana Yoni-Maki hida Venuwa'ata Yamumuna Yesu fa'ine gimidi'etoladina tu muliya Madiu Luke Yoni yadi buki hi'etoladina. Maki keke Yesu yana yo'o tuwelo kalivana tu kaliva halamanidiyao hivaitana Fita yana laumamala againe Maki Yesu kahihina ginogalini-yo gi'etoladina. Atu Yelusalema againe gilakata fa'ina, Yesu yana gugai tauna gi'itana. Ka'i kwanatubulakahina kahihina Maki 14:51-52 againe gidadauda-ma bana Maki tauna. Kadu muliya Folo Banabasi yadi faisewa againe givelugadi.

Tu Maki nuwanuwana badi miLoma fafali moya'aina hivehimeyedi-ma Yesu kahihina hina-halamanena. Badi miLoma faiwala kadu kai-wabu nuwadi givaina fa'ina, Yesu tofaiwala-mo'a kadu kaliva yana wa'abavehimeya ma Maki yana buki againe giseyemaunena be higa miLoma kadu moya'aida adafaiweya kanahalamanena Yesu velemona Yaubada Natuna. Yesu yana aituha fifiwalana moya'aina gilukahihiyena tu yana vehawala tufonaga giyakahina. Sa'eyana ma Yesu yafune balauma moya'aidi gifaiwala-hegedi kadu Bana kaliva ada Toveluga ada Tok-ibababala ma gihawavemogatalena.

Tu buki ana lauyabu againe kahihi mali kaliva gi'etoladina-ma [ ] hinagene gidadauda.

*Yoni Tobafitaiso Yesu yana ela fa'ina givenuwa'ata.*

*Madiu 3:1-12 Luke 3:1-18 Yoni 1:19-28*

<sup>1</sup> Venuwa'ata Yamumuna Yesu Keliso Yaubada Natuna fa'ina hidede amine. <sup>2-3</sup> Tuwai-mo'ena Yaubada bonana ana to'awatalatalaina ana egana Aiseya gahe sa'eyana gi'etoladina. Yaubada yana gahe Natuna againe gi'etoladina gigayo, U'ita, hida yaku tovenuwa'ata.

Bana gana'iveninisena be wai ginanagona, ya eda kaliva ase'asediya ginakidewedewena. Kaliva agona hinanogalina wala'aiya ginakovakovadadana ginagayo, Kaiwabu yana eda wanavetauna, yana eda ase'ase miya wana'ihagihagiyena. Hidedemi Aiseya gigahe.

<sup>4</sup> Ada gavaimi tuwai-mo'ena Aiseya gigaheye-vagahina, medemi gilakayemu vele mo'ena. Fa'ina Yoni wala'aiya yana ivemogatala gilakayemu gilulumamala gigayo, “Yami dewa koyona wanavenikohiyena be wanahagavilamiyo wanabafitaiso be Yaubada yami koyona ginayawelina.” Hidedemi Yoni gilulumamala.

<sup>5</sup> Kaliva moya'aidi Yudiya ana fafali kadu Yelusalema againe hitauya be hina Yoni yana laumamala hinanogalina. Yadi dewa koyona hiyau-yo gufa ana egana Yolidani againe gikivebafitaisoyedi. <sup>6</sup> Bana Yoni ma yana miyami kaliva koyokoyo-'avana amine. Aikeva kameli utuutuna againe hiyogona-ma gi'osena ada gaiyona bulumakau kwafiline hiyogona ma goline gihifona. Ada anaga ma koloma kadu ma'awa gufadi amine. <sup>7</sup> Ada

gilulumamala gigayo, “Iya wai ganagona tu kaliva sa'eyana wai ginamulina-ma gifaiwalahegeku. Bana kikaiwabu-mo'ena tu iya kwamana kabisoku fa'ina, keke akufaiweya Bana againe ganave'agetoga be gana'aibo'ula-yo ana ageyafayafa adi aba'aiyauga ganayauni. <sup>8</sup> Iya gufa againe gakivebafitaisoyemi tu Bana'e ma Alu'aluwa Mahalina againe ginakivebafitaisoyemi be ginavemagami.” Hidedemi Yoni gilulumamala.

*Yesu gibafitaiso tu Setani gi'aladibidibiyena.*

*Madiu 3:13-17, 4:1-11 Luke 3:21-22, 4:1-13*

<sup>9</sup> Himiyami tu Yesu Nasaledi Galili ana fafaliya gitauya be Yoni againe gi'ela, ada Yoni Yolidani againe gikivebafitaisoyena. <sup>10</sup> Ada Yesu gibafitaiso gihavaina, gufeya gi'alakahini tu auhe'ama lobama gi'ayavalini-yo Yaubada Alu'aluwana ana ita vaita bunebune amine Bana againe gihobu'ela ma gi'itana. <sup>11</sup> Ada Yaubada agona lobameya gikova gigayo, “O'eni natu'ase'aseku, nuwaku ukiveyamumu-mo'ena.”

<sup>12</sup> Yesu Yolidani againe gibafitaiso tu auhe'ama Alu'aluwa Mahalina babigaga againe giwavina. <sup>13</sup> Ada aiyeta foti agaidiya babigaga againe gimiyami tu Setani gi'ala'aladibidibiyena. Ada kevakeva walawala'a hinafadiya gimiyami keke tamo kaliva tu lobama ana tovenuwa'ata hi'ela hi'itave'avina.

*Yesu tobayauma gikovadi be hinavetomuliya.*

*Madiu 4:12-22 Luke 5:1-11*

14-15 Tu Yesu Yoni valeyana ginogalina higa deliya hisena. Ada hidedemi ginogalini-yo gilowoga fafali ana egana Galili againe gina be Yaubada yana Venuwa'ata Yamumuna gilulumamalena gigayo, “Yaubada yana aituha a gilakayemu. Tova kabisona kaliva yana itave'avina againe hinamiyami be ase'asediya ginavehivehimeya. Au yami dewa koyona wanavenikohiyeni-yo wanahagavilami be Venuwa'ata Yamumuna wanavetumaganena.” Hidedemi Yesu gilulumamala.

16 Tova sa'eyana Yesu tobu ana egana Galili ana taliyeya ginauna tu Saimoni kadu taina Anidulu gi'itadi. Alevatu hisesehobuyeni tu gi'itadi fa'ina badi tobayauma. 17 Ada Yesu gighahedi gigayo, “Wa'ela wanamuliyeku be kaliva adi bayauma ganavehawalemi.” 18 Ada auhe'ama kaliva adi'iselu yadi alevatu hisehobuye-vagahini tu himuliyena.

19 Kadu ginauna tu matalaviseya Yemesa wataina Yoni Sebedi natuneyao gi'itadi, wakeya hihiyoto yadi alevatu gi'akaninina-ma hikikidewedewena. 20 Ada auhe'ama gikovadi be hinamuliyena. Au tamadi Sebedi yana tofaisewa buye wakeya himiyami-ma hinuyabuyabudi be Yesu himuliyena.

*Yesu kaliva wayafunena gikiveyamumuna.*

*Luke 4:31-37*

21 Hinauna tu Kafeneumi againe hiyemu. Ada sabati againe Yesu manawa-abavehawala ana egana sinagogi againe giluku givebutu

givehawala. <sup>22</sup> Ada yo'o yana vehawala fa'ina hiyaulowoga higayo, “Keke Mosese yana vehimeya ana tovehawala amine gidavehawala, au vaita tovehimeya velemo'ena amine givehavehawala, yana vehawala ase'aseda gi'onana.” <sup>23-24</sup> Higahegahe tu kaliva wayafunena yadi sinagogi againe giluku gikova'awafatafata gigayo, “Yesu kwanaNasaledi gavadi ime agaimeya unagani-yo u'ela? Ka'i O u'ela be ime yafune ama loi unamunuma-yo anabwavi? O ya inuba gahalamanena. O'eni Yaubada yana Kaliva Mahamahali.”

<sup>25</sup> Tu Yesu yafune gihawatana gigayo, “Gi'alove. Una, kaliva unuyabuyabuni.” <sup>26</sup> Yafune kaliva gikivefavefanina toyogina gitatawayana-yo ginuyabuyabuna.

<sup>27</sup> Kaliva moya'aidi hi'ita-yo hiyaulowoga-mo'a buye hive'agahegahe higayo, “Hida hima gava'ana? Yana vehawala tuli-mo'ena kadu ana wavehimeya. Yafune nonogana hida kaliva gihawatadi-ma bonana hi'abina.” <sup>28</sup> Ada au Yesu valeyana Galili ana fafali matatabuna againe give'aliyahega.

*Yesu to'aulolo moya'aidi gisiveyawadi.*

*Madiu 8:14-17 Luke 4:38-41*

<sup>29</sup> Tu Yesu manawa-abavehawala againe gihobu-yo gina Saimoni Anidulu yadi manuweya. Ada Yemesa Yoni badi buye hina manuweya hiluku. <sup>30</sup> Saimoni lawana adi iviya hidauda wowodi vaita ai, ada badi fa'idiya Yesu himaduvunuwa'atana. <sup>31</sup> Au gina gi'itadi

nimadiya gi'abi be gisivemidididi. Wowodi auhe'ama gituluna ada hivebutu adi wakawaka adiga hikidewedewena.

<sup>32</sup> Mala gibogi kauwana giholu-yo kaliva yadi to'aulolo moya'aidi kadu wayafunediyo Yesu againe hi'aliyedi. <sup>33-34</sup> Melala ana kaliva moya'aidi Saimoni yana eda'awaneya hivaga'auta-'owoga, ada Yesu to'aulolo moya'aidi yadi aulolo tulina tulina ma gisiveyawadi. Kadu yafune moya'aidi kaliva hiluvaiyedi-ma giwawidi, ada yafune Bana inubana hihalamanena fa'ina gihawatadi be keke hinalukahihiyeni.

*Yesu Galili ana fafaliya gilulumamala.*

*Luke 4:42-44*

<sup>35</sup> Tu aiyeta anavelu mala aimo keke gidalauni tu Yesu gi'enohobu be gina melalagaga sa'eyana againe give'ove'o'ola. <sup>36-37</sup> Saimoni tobohiyaneyao buye hina hilelena ada hinuhagana againe higayo, “Kaliva moya'aidi O hilelele.”

<sup>38</sup> Yesu gigayo, “Wa'ela be kana mali melaleya be kadu badi agaidiya ganalulumamala. Hidema fa'ina gahobu'ela.” <sup>39</sup> Ada au Galili ana melala moya'aina agaidiya ginunuwaliliuga, yadi manuwa-abavehawala agaidiya gilulumamala, adi yafune giwawiwawidi.

*Yesu tovedawodawowo gikiveyamumuna.*

*Madiu 8:1-4 Luke 5:12-16*

<sup>40</sup> Tu tovedawodawowo sa'eyana gi'ela Yesu againe tugana give'etodonena be

gihawayafeyafena gigayo, “Ka'i nuwanuwa digo, afaiweya unakiveyamumuku.”

<sup>41</sup> Gigahe-yo Yesu gihinekalikaliyena nimana gitunena kaliva gi'abina gigayo, “Iya nuwanuwaku. Au unayamumu.” <sup>42</sup> Ada auhe'ama ana dawodawowo gihavaina be giyamumu.

<sup>43-44</sup> Giyamumu tu Yesu gimadu'atuhegena ana hawata givelena gigayo, “Unogali. Keke tamo hakwadi unavenuwa'atani, au abaveyao ana to-faisewa againe unamaduna be wowo unavehawalena. Kadu ya yamumu fa'ina manuga luhei ada sifi, higa abaveyao Mosese boi tuwaimo'ena givehimeyena amine ma unanauwedi be moya'aidi o uyamumu velema'ena ma hinahalamanena.”

<sup>45</sup> Atu kaliva gilowoga be gina yana yamumu valeyana givebutu kaliva moya'aidi agaidiya gilukahihiyena, ada au valeyana ginauna. Moya'aidi hiyo'oyo'o fa'ina, Yesu keke anafaiweya melaleya ginaluku kaliva matadiya. Au melalagaga agaidiya gimiyami. Atu kaliva melala tulina tulina agaidiya hitauya be Yesu againe hiyo'o.

## 2

*Yesu tovefela gisiveyawana.*

*Madiu 9:1-8 Luke 5:17-26*

<sup>1</sup> Aiyeta gavaiyehi himiyami tu Yesu Kafeneumi againe giyewana ada valeyana ginauna vaita yana manuweya gidamiyami. <sup>2</sup> Kaliva moya'aidi Bana againe hivaga'auta be manuwa vetawana

hibabalina, keke tamo abaga, kadu eda'awana keke tamo abaluku. Hidede amine hiyo'oyo'o tu Yesu badi agaidiya gilulumamala. <sup>3</sup> Kaliva tufoidi hi'ela kaliva walogina gi'a'uwana-ma hi'aliyena ana towahi kaliva adivefowa. <sup>4</sup> Yo'o lakahina fa'ina keke adifaiweya tofefela Yesu liline hinaseni. Hidede fa'ina hilaka manuwa getane ada hami Yesu gimiyami amine hifolena. Manuwa getana hi'etovahivahini-yo tofefela wa'ivina hisehobuyena. <sup>5</sup> Ada Yesu yadi vetumagana gi'ita-yo tofefela againe gigahe gigayo, “Natuku, ya koyona ahe gayawelidi.”

<sup>6-7</sup> Tu Mosese yana vehimeya ana tovehawala tufoidi medede againe hihiyoto-ma Yesu yana gahe hinogalini-yo nuwahinagediya hitolilualuva higayo, “Gavadi-yo hida kaliva gigahe vaita Bana tauna koyona adi to'aiyawela? Hima Yaubada gihawatagona. Yaubada anakaibe koyona ana to'aiyawela.”

<sup>8</sup> Hidede amine nuwahinagediya hitolilualuva tu Yesu yadi nuwanuwa ase'asene gimadu'ayaunena ada gigahedi gigayo, “Gavadi-yo medede amine ase'ase miya watolilualuva? <sup>9</sup> Gavaimi tofefela againe ganagahe-yo ginalakayemu? Ka'i ganagayo, Ya koyona ahe gayawelina, o ka'i ganagayo, Umidi a ivi u'avalani be unaudadana. Hadema vehimeya vita-mo'ena? Me kaliva ana siveyawa vaita vita-mo'ena fa'ina ka'i ganavehimeya tu keke ginayamumu, au taumiyao amifaiweya wana'itahalamanena kaliva adi siveyawa keke akufaiweya. <sup>10-11</sup> Atu hida kaliva ganasiveyawana be wana'itani-yo Iya fa'ikuya wanagahe wanagayo, Velemodi.



Bana Tohobu'ela kaliva yadi koyona adi aiyawela au ana tagalowalowa.” Ada au tovefela againe gigahe gigayo, “Ganagahe. Umidi a ivi uwahi be una ya manuweya.”

<sup>12</sup> Au tovefela gimidi ana ivi gimadu'avalaniyo moya'aidi matadiya gina gihobu. Kaliva moya'aidi hi'ita-yo hiyaulowoga Yaubada ana egana hikilakahina higayo, “Boi keke tamo hidede amine gavadi kada'itani.”

*Yesu Livai ana egana velugana Madiu*

*gikovana be ginamuliyena.*

*Madiu 9:9-13 Luke 5:27-32*

<sup>13</sup> Tu Yesu kadu gihobu tobu ana egana Galili ana taliyeya gina. Kaliva moya'aidi Bana againe hiyo'oyo'o ada givebutu givehawaledi. <sup>14</sup> Ginauna tu takesi ana toyaudi sa'eyana gi'itana ana egana Livai, Alifiyo natuna. Bana Livai takesi ana abayaudi againe gihiyoto. Ada gi'ita-yo gigahena gigayo, “Unamuliyeku.” Au bana Livai gimidi be gimuliyena.

<sup>15</sup> Muliya Livai yana manuweya giluku be gina'a. Ada tolameya gi'au'a tu takesi ana toyaudi moya'aidi kadu tokoyona velugadiyao Bana Yesu kadu ana tomuliya buye hi'enolukekela tu hi'au'a. Fa'ina badi kalivai-dina tufoidi moya'aidi himuliyena. <sup>16</sup> Tu Mosese yana vehimeya ana tovehawala, higa Falisi adi loi, Yesu tokoyona kadu takesi ana toyaudi buye hi'au'a ma hi'itadi againe, ana tomuliya higahedi higayo, “Gavai'ona-yo wama kaliva koyodiyao takesi ana

toyaudi kadu tokoyona velugadiyao Bana badi buye hi'a'au'a?"

<sup>17</sup> Yesu yadi gahe ginogalini-yo gigahedi gigayo, “Badi yadi aulolo keke ma keke doketa againe hinana tu to'aulolo ma nuwanuwadi doketa yana leme. Ada toyamumu keke doketa yana leme hinaleleni amine, meda anafaiweya Iya gahobu'ela be keke toyamumu vehimeya hi'ita'itave'avinama ganayowanidi. Au gahobu'ela be tokoyona ganayowanidi be yaku leme againe hinanuwavilana.”

*Labewaviyo fa'ina Yesu hitoliluluvena.*

*Madiu 9:14-15 Luke 5:33-35*

<sup>18</sup> Tova sa'eyana Yoni ana tomuliya kadu tonagona tafatafalolodiyao adi egana Falisi hilabelabewaviyo. Kaliva tufoidi hi'ela Yesu hitoliyena higayo, “Gavana fa'ina Yoni ana tomuliya kadu Falisi adi tomuliya hilabelabewaviyo be hinave'o'ola fa'ina, tu a tomuliya keke tamo tova hidalabelabewaviyo?”

<sup>19</sup> Yesu gigahedi gigayo, “Nagi ana avemwamwala againe tonagi ana yo'o keke hinamiya-kawowo, au a'a hina'au'a, fa'ina bana tonagi aimo badi buye himimiyami. Aimo tonagi buye himimiyami keke adifaiweya hinalabelabewaviyo.

<sup>20</sup> Tu aimo tonagi hinanauwena lauveya ana toveya, au medema tovai-nadi ana yo'o hinamiya-kawowo, a'a keke hina'ani. Meda anafaiweya Iya yaku kaliva buye amimiyami fa'ina keke hidalabelabewaviyo.” Au hidedemi Yesu gigahedi.

*Yesu yana vehawala ivaguna keke kaliva yadi nuwanuwa tuwaina buye kanave'atutamo'aini.*

*Madiu 9:16-17 Luke 5:36-39*

<sup>21</sup> Kadu Yesu gigayo, “Keke tamo hakwadi aikeva tuwaina kaleko ivaguna keke gufeya gida'utuvini-ma againe ginabwadini. Ka'i hidede amine gidabwadina digo aikeva ana bwadi gida'akaninina, fa'ina kaleko ivaguna gidalautaina ada au kaliva ana aikeva gidakoyomo'a. <sup>22</sup> Kadu keke tamo hakwadi oine ivaguna manugose kwafilidi tuwaina againe ginahiwani. Ka'i hidede amine gidahiwana digo, oine ivaguna gidatubuga be kwafilidi tuwaina a gikwakwana-ma gida'afolena, ada au oine kadu manugose kwafilidi gidakoyo. Ka'i oine ivaguna digo, kadu kwafilidi ivaguna.” Au hidede amine Yesu gigahetalahobuhobu.

*Sabati ana vehimeya fa'ina.*

*Madiu 12:1-8 Luke 6:1-5*

<sup>23</sup> Sabati sa'eyana againe Yesu witi ana faheya ginunudadana. Ana tomuliya buye hinauna tu tomuliya hivebutu witi nafona hikikikolukolu. <sup>24</sup> Ada Falisi higahena higayo, “U'ita, gavadiyo a tomuliya sabati ana vehimeya keke hida'itave'avini?”

<sup>25-26</sup> Yesu gigayo, “Tokaiwabu Devida tuwai-mo'ena gimiyami-ma kahihina ma'i wahawahawana o ka'i keke? Tova sa'eyana abaveyao ana tofaisewa adi tokaiwabu ana egana Abaiyata yana toveya, Devida tobohiyaneyao buye adiga keke be mafu gilaudi tu Yaubada yana

manuweya giluku, a'a Yaubada matane hisenama givaina tu hawahawatana nonogana gi'ana kadu yana kalivamomo giveledi be buye hi'ana. Mena a'ai-nadi kaliva-kawowo fa'idiya hawahawatana tu abaveyao ana tofaisewagaga adifaiweya hina'ana.” Hidedemi Yesu bonadi gifatana.

<sup>27</sup> Kadu gigahedi gigayo, “Kaliva adi veluga fa'ina Yaubada veyawai ana tova gisena. Keke kaliva gidabubudi veyawai ana tova ana hawata fa'ina. <sup>28</sup> Au Iya Tohobu'ela aku egana tovehimeya, fa'ina Iya kadu sabati ana to'itave'avina. Yaku kaliva sabati ana hawata hina'itave'avina o ka'i keke hina'itave'avini, medema Iya yaku abavehimeya.” Hidede amine Yesu gigahedi.

### 3

*Yesu kaliva nimana koyona sabati againe gikiveyamumuna.*

*Madiu 12:9-14 Luke 6:6-11*

<sup>1</sup> Kadu tova sa'eyana Yesu manuwa-abavehawala ana egana sinagogi againe giluku. Medede againe kaliva sa'eyana gimiyami, nimana gifwalele-vagata. <sup>2</sup> Kaliva tufoidi nuwanuwadi Yesu yana dewa hinahawavekoyoyena fa'ina, Bana hi'ita'ita-kwanekwanena be hina'itana ka'i nimakoyo sabati againe ginakiveyamumuna o ka'i keke. <sup>3</sup> Yesu nimakoyo againe gigahe gigayo, “U'ela we'ai.”

<sup>4</sup> Ada tolauboda agaidiya gigahe gigayo, “Yada buki-vehimeya sabati fa'ina gavaimi givehimeyeda? Ka'i kaliva sabati againe kanakiveyamumuna o ka'i kanakivekoyona?”

Ka'i kanalugolegolena o ka'i kanaluve'alikana?" Hidedemi Yesu gitolilualuva tu badi hive'amata.

<sup>5</sup> Ada keke nimakoyo hida'itanuwakabubuyeni fa'ina, Yesu ase'asena gi'u'aulolo ada yana wanuwakoyo gilumataviledi tu nimakoyo againe gigahe gigayo, "Nima utune." Nimana gitunena ada auhe'ama giyamumu. <sup>6</sup> Badi Falisi hihobu be hina Helodi yana yo'o kalivadi buye hivaga'auta hivevai be higa gavaiya'amine Yesu hinaluve'alikani.

*Kaliva Yesu againe hiyo'oyo'o Galili ana tobu liline.*

<sup>7-8</sup> Tu Yesu mena melala gihege tu ana tomuliya buye hina Galili ana tobu liline, ada yo'o lakahi-mo'ena hibwa'ulina. Fafali moya'aina agaidiya hitauya, Galili ana fafali Yudiya ana fafali Yelusalema ana melala Idumiya ana fafali kadu melala moya'aina yuwa Yolidani fafaline, kadu Taiya Saidoni adi melala moya'aina agaidiya hitauya. Gavadi gavadi moya'aina gififaisewana-ma valeyana hinogalina againe hivaga'auta. <sup>9</sup> Ada yo'o lakahi-mo'edi fa'ina Yesu ana tomuliya gigahedi gigayo, "Waka kabi'ona wana'ihagihagiyena fa'ina kaliva hiyo'oyo'o be ka'i hinavetuwahegeku, au ganayage." <sup>10</sup> Kaliva moya'aidi gisiveyawadi fa'ina to'aulolo adi aulolo tulina tulina hiveve'atuwahega be hinakibwa'eni-yo hinayamumu. <sup>11</sup> Ada badi wayafunediyo hi'ita-yo agene hibe'u hitatawayana higayo, "Iyoi. O'eni Yaubada Natuna." <sup>12</sup> Atu Yesu

gihawatadi toyogina be Bana inubana keke hinahawavemogataleni.

*Yesu afositolo tuwelo givenuwadanededi.*

*Madiu 10:1-4 Luke 6:12-16*

<sup>13</sup> Tu Yesu oyeya gilaka ada kaliva gaveyao nuwanuwana, medema giyowanidi be Bana againe hilaka'ela. <sup>14-15</sup> Ada kaliva tuwelo givegidedi ada givewagadi afositolo higa bonana ana towahidadana. Givegidedi be higa badi Bana buye hinamiyami kadu gina'iveninisedi be hinalulumamala, ada abavehimeya ginaveledi-yo yafune hinawavidi. <sup>16</sup> Ada kaliva tuwelo givenuwadanededi-ma adi egana hidede amine. Saimoni tu ana egana velugana givelena-ma Fita. <sup>17</sup> Yemesa kadu taina Yoni Sebedi natuneyao tu adi egana velugana giveledi-ma Bowanedisi, higa ana kaivila atala natuneyao fa'ina yadi gahe vaita atala amine. <sup>18</sup> Kadu Anidulu Filifi Batolomiu Madiu Tomasi Yemesa Alifiyo natuna, kadu Tadiyasi, kadu Saimoni bana yo'o miLoma hivenibainedi-ma kalivana. <sup>19</sup> Kadu Yudasi-Isikaliyota bana Yesu nibaineyao nimadiya gihawavemogatalena amanadi.

*Tufoidi higahе vaita Biyelisibuli higa Setani*

*Yesu gidaluvaiyeni.*

*Madiu 12:22-37 Luke 11:14-23*

<sup>20</sup> Yesu yana yo'o tuwelo givegidedi gihavaina, giyewana yana manuweya. Kadu'e kaliva hiyo'oyo'o fa'ina, Bana ana tomuliya buye keke adifaiweya hina'a. <sup>21</sup> Ma ana unuma hidedemi

hinogalina againe, hilowoga be hinavega'aulena fa'ina higahegahe higayo, "Givekabakabaleya."

<sup>22</sup> Ada Mosese yana vehimeya ana tovehawala Yelusalema againe hitauya-ma higahe higayo, "Biyelisibuli giluvaiyena. Bana Biyelisibuli yafune adi tovehimeya yana faiwala againe yafune giwawiwavidi."

<sup>23</sup> Hidede amine higahegahe fa'ina Yesu giyowanidi be hi'ela, gahetalahobuhobu amine gilukahihiyedi gigayo, "Keke Setani tauna ginawavini, keke-mo'a. <sup>24</sup> Hai fafali ana melala tulina tulina buye hilulugaviya, medema taudiyao hinavehavaidi. <sup>25</sup> Kadu hai yo'o ana kaliva tova moya'aina buye hivekwavekwageya, medema hina'abi'ota'ota be yo'o ana egana ginahavaina. <sup>26</sup> Meda anafaiweya ka'i Setani tauna yana yo'o higa yafune ginavekwageyedi be ginawavidi digo, bana tauna yana yo'o ginavehavaidi ada au yana abavehimeya ginahavaina. <sup>27</sup> Ka'i kaliva manimaninina yana manuweya ginamiyami, au keke tamo hakwadi anafaiweya ginaluku kaliva yana lokoloko ginavaini. Nagona kaliva manimaninina ginayogoni-yo yana lokoloko ginavaina. Meda anafaiweya Iya Setani ganayogoni-yo kaliva wayafunedi gana'ihagihagiyedi.

<sup>28</sup> Gagahe velema'ena, Yaubada kaliva yadi dewa koyona tulina tulina ginayawelina, kadu gavadi gavadi yadi gahe-kawowo againe Yaubada hinahawatagona-ma ginavenuwauluyena. <sup>29</sup> Atu hai kaliva yana gahe-kawowo againe Alu'aluwa Mahalina ginahawatagona, medema yana koy-

ona Yaubada keke ginayawelini, keke-mo'a. Au yana hawatagona ana vita ginawahi-vagahina.”  
<sup>30</sup> Yesu hidede amine gigahe, fa'ina Alu'aluwa Mahalina yana faiwala againe yafune giwaviwavididi tu badi kaliva higahe vaita yafune Yesu gidaluvaiyeni.

*Yesu hinana kadu taineyao hilakayemu.*

*Madiu 12:46-50 Luke 8:19-21*

<sup>31</sup> Yesu gimiyami tu hinana kadu tobohiyaneyao hilakayemu. Melaleya himidimidi tu kaliva sa'eyana higahena be Yesu ginagahena. <sup>32</sup> Yo'o hitogafifina ada higahena higayo, “Hina kadu tobohiyamomo melaleya himimiyami, nuwanuwadi hina'ita.”

<sup>33</sup> Bana Yesu gigayo, “Hakwa'adi hinaku? Kadu gaveyao tobohiyakweyao?” <sup>34</sup> Ada badi hitogafifina-ma gilumataviledi-yo gigahe gigayo, “Hidema hinaku kadu tobohiyakweyao. <sup>35</sup> Fa'ina hai kaliva o vevine Yaubada yana nuwanuwa hi'ita'itave'avina, medema tobohiyaku o nouku o hinaku.” Hidedemi Yesu gigahe.

## 4

*Otova babi tulina tulina againe ana gahetalahobuhobu.*

*Madiu 13:1-9 Luke 8:4-8*

<sup>1</sup> Kadu'e tova sa'eyana Yesu givebutu Galili ana tobu ana taliyeya givehawala. Kaliva moya'aidi hiyo'oyo'o ada himidififina fa'ina, tobuya waka againe giyage tu yo'o avaleya himidimidi. <sup>2</sup> Ada nuwanuwa tulina tulina gahetalahobuhobu



amine givehawaledi, ada yana vehawala againe gigahedi gigayo, <sup>3</sup> “Wanogali. Kaliva sa'eyana witi nafona yana faheya ginawena be gina'iyauyaulena. <sup>4</sup> Witi nafona gi'iyauyaulena tu tufona edeya gibe'u au manuga hi'ela be hi'ana. <sup>5</sup> Tufona babi dabodabona againe gibe'u. Medede againe babi yamumuna keke lakahina gidadauda. Ada babi yamumuna keke vewabana fa'ina, witi nafona gimadukabu. <sup>6</sup> Ada kauwana gilaka againe witi tubuvaguna gikabuna be gibou, walamina keke gidavegilili velemo'ena fa'ina. <sup>7</sup> Kadu tufona aboda againe gibe'u ada au yogo gifaiwala be witi gilufave'alikana, keke tamo guwana. <sup>8</sup> Kadu tufona babi yamumuna againe gibe'u be gitabo yamumuna. Gitabotabo tu giboyalina ada witi guwana tufona teti (30) amine, tufona sikisiti (60) amine kadu tufona hanaledi (100) amine.” Yesu hidedemi gihetalahobuhobu.

<sup>9</sup> Kadu gigayo, “Omi kaliva watagami, au bonaku wadavenogalena.”

*Yesu gahetalahobuhobu inubana gilukahi-hiyena.*

*Madiu 13:10-17 Luke 8:9-10*

<sup>10</sup> Ada muliya yo'o a hina tu Yesu anakaibe gimiyami tu yana yo'o tuwelo kadu tomuliya velugadiyao tufoidi Bana buye himiyami-ma yana gahetalahobuhobu fa'ina hitoliloveluvena. <sup>11</sup> Gigahedi gigayo, “Yaubada yana itave'avina ana nuwanuwa sevasevauyana omi agaimiya giyauna, tu badi kaliva-kawowo keke

Yaubada yana yo'o agaidiya hidaluku-  
 ma gahetalahobuhobu amine hinogalina.  
<sup>12</sup> Gahetalahobuhobugaga hinoganogalina,  
 tuwai-mo'ena Yaubada bonana eto'etoladina  
 gigahe amine gigayo,  
 Tova moya'aina bonaku hina'ita'itana  
 tu keke hina'itahalamaneni.  
 Kadu hinanoganogalina  
 tu keke ana nuwanuwa hinahalamaneni.  
 Ka'i hidahalamanena digo,  
 Iya agaikuya hidahagaviladi  
 be yadi koyona gadavenuwauluyena.”

*Yesu gahetalahobuhobu guwana ana iyauyaula  
 fa'ina gikivetuvetunudi.*

*Madiu 13:18-23 Luke 8:9-15*

<sup>13</sup> Tu Yesu Veyao Tuwaina ana gaha  
 giyahahini-yo au gigahedi gigayo, “Mena  
 gahetalahobuhobu adamoya galukahihiyena-ma  
 ana nuwanuwa ma'i wahalamanena o ka'i keke?  
 Gavaimi be gahetalahobuhobu velugana aimo  
 ganalukahihiyena-ma wadahalamaneni? Yami  
 halamana givekwalu. Mena gahetalahobuhobu  
 sa'eyana fa'ina ganakivetuvetunumi. <sup>14</sup> Guwana  
 ana to'iyauyaula ma vaita Yaubada bonana  
 kaliva ase'asediya gida'iyauyauleni. <sup>15</sup> Kaliva  
 tufoidi vaita witi nafona edeya gibe'u-ma  
 amine. Yaubada bonana hinogalina tu Setani  
 gi'ela be gava nuwanuwa tolaumamala kaliva  
 ase'asediya gifahana-ma givaina. <sup>16</sup> Kadu meda  
 anafaiweya kaliva tufoidi vaita nafona babi  
 dabodabona againe gibe'u-ma amine. Yaubada  
 bonana hinogalina be yadi wavemwamwala

ase'asediya himadusena. <sup>17</sup> Atu bonana keke hidanuwa-nunauyeni walamina keke ase'asediya gidavegilili fa'ina, tova kabisonaga hi'atuvefa'ila. Ka'i tova vitana badi agaidiya ginalakayemu o ka'i yadi hawahega Yaubada againe fa'ina aulolo tagiya kaliva nimadiya hinanuhagana, au hinamadunuwayewa. <sup>18-19</sup> Kadu tufoidi vaita nafona abodeya gibe'u-ma amine. Yaubada bonana hinogalina tu babi ana gaitoma fa'ina hivenuwanauna, kadu tova moya'aina mani lokoloko nuwadi givaivaina ada gavadi tulina tulina hi'ita'italuvadigena fa'ina nuwadi giulu. Au mena gaitomai-dina Yaubada bonana gilufave'alikana ada guwadi keke. <sup>20</sup> Atu tufoidi vaita nafona babi yamumuna againe gibe'u-ma amine. Yaubada bonana hinogalina be ase'asediya hisena, ada au yadi dewa againe guwadi hiseseyemaunena ka'i 30 o 60 o 100 amine.” Hidede amine Yesu gigahe.

*Yaubada bonana ana venogala lamufa againe giluvefosena.*

*Luke 8:16-18*

<sup>21</sup> Kadu Yesu gigahedi gigayo, “Keke tamo hakwadi lamufa ginakabuni-yo avaeka hinagene o ka'i ivi dibune ginaseni, keke-mo'a. Au ana abasewadi againe ginasena. <sup>22</sup> Gavadi gavadi moya'aina tova adamoya keke i'ivemogatalina medema aimo tova mulina kabu'avane ginalakayemu, kadu gavadi gavadi sevasevauyana medema aimo moya'aidi hinahalamanena. <sup>23</sup> Hai kaliva taga afolegina,

medema bonaku udavenogalena.” Hidedemi Yesu gigahe.

<sup>24</sup> Kadu gigayo, “Yaubada yana nuwanuwa wananogalina, wananogali-hagihagiyena. Ka'i Yaubada bonana ana nogala againe wanadibumuhiga, halamana wanavaina kadu Yaubada yami halamana ginakivetubugina. <sup>25</sup> Fa'ina hai kaliva Yaubada yana nuwanuwa ginogalina be gi'ita'itave'avina, medema againe kadu nuwanuwa moya'aina ginayauna. Atu hai kaliva Yaubada yana nuwanuwa keke gida'ita'itave'avini, medema yana halamana kabi'ona Yaubada ginavaihegena be ginamiyakawowo.” Hidedemi Yesu gigahe.

*Faha yana tabo ana gahetalahobuhobu.*

<sup>26</sup> Kadu gahetalahobuhobu sa'eyana Yesu gilukahihiyena gigayo, “Kaliva Yaubada yana itave'avina againe himimiyami be ase'asediya givehivehimeya-ma yadi miyami hidede amine. Kaliva sa'eyana yana faha againe nafona gi'iyauyaulena. <sup>27</sup> Bogi gidada uyadayada gimimiya tu nafona gitabotabo be gilakalaka. Atu gavaiya'amine yana faha gitabo ma keke gidahalamaneni. <sup>28</sup> Au babi tauna faha gikivetabona, nagona gikabu hinafane gitabo muliya a'a-mo'ena gisena. <sup>29</sup> A'a-mo'ena ginaboyalina againe, ilama tubu'oduna againe ginayaudi fa'ina a'a ana yaudi ana tova a gilakayemu.” Hidedemi Yesu gigahe.

*Yaubada yana itave'avina vaita masitada*

*yana tubutubuga amine.*

*Madiu 13:31-32,34 Luke 13:18-19*

<sup>30</sup> Kadu Yesu gigayo, “Kaliva Yaubada yana itave'avina againe himimiyami be ase'asediya givehivehimeya-ma yadi tubutubuga gavaiya'amine kanalukahihiyeni? Gava gahetalahobuhobu amine kanakivetuvetunu?

<sup>31-32</sup> Masitada yana tabo amine kanalukahihiyena. Nafona tulina tulina adi loi againe masitada nafona kabikabi'ona. Kaliva givaina be gifahana. Babiya gidauda tu gikabu, ada nafona kabikabi'ona nonogana gikabu againe give'aihala. E, laganina lakahina gisena be manuga hi'ela aiwa'une hive'uba.” Hidedemi Yesu gigahe.

<sup>33</sup> Ada au Yesu gahetalahobuhobu moya'aina hidede amine kaliva agaidiya gilumamalena. Yadi halamana gavaiya'amine medemi givehawaledi. <sup>34</sup> Yo'o agaidiya gahetalahobuhobugaga amine givehawaledi, keke gidagahe-mo'edi. Tu Tauna ana tomuliya adikaibe'uyanina buye himiyami ana toveya, gaitoma moya'aina fa'ina gikivetuvetunudi.

*Yesu mala lakahina gihawatana be gi'alovena.*

*Madiu 8:23-27 Luke 8:22-25*

<sup>35</sup> Tu medema aiyetai-nadi mala gisilavina Yesu ana tomuliya gigahedi gigayo, “Wa'ela be yuwa kanadamana tobu fafaline.” <sup>36</sup> Yesu wakeya gimiyami tu ana tomuliya yo'o hihegedi-yo hiyage be hiwoiyedamanena. Kadu waka velugadiyao buye hilowoga. <sup>37</sup> Hinauna tu bolimana lakahina

gimadu ada lefo waka againe gibifuwafuwana be gufa gilukuluku. <sup>38</sup> Tu Yesu ma waka muline ana fila againe gi'enonuwaulu be gidauda. Badi tomuliya hiluvaguna higayo, “Tovehawala, gavana anada? Ka'i keke udanuwanuwa kabisona kana'alika?”

<sup>39</sup> Au gimidi bolimana gihawatana, gigayo, “Mala auwe.” Kadu lefo gigahedi gigayo, “Au gi'atago.” Ada auhe'ama bolimana gi'atagona ada niwalova-'utuutu gisena.

<sup>40</sup> Ana tomuliya gigahedi gigayo, “Gavadi-yo wamatautave'ine. Hai yami vetumagana?”

<sup>41</sup> Ada au ase'asedi gi'akolukoluna buye hive'agahegahe higayo, “Bana hida gava kaliva? Taumadi, bolimana kadu lefo Bana bonana gi'abina!”

## 5

*Yesu kaliva wayafunena gikoyo-mo'a ma gikiveyamumuna.*

*Madiu 8:28-34 Luke 8:26-39*

<sup>1</sup> Tu Yesu ana tomuliya buye Galili ana tobu yuwa fafaline hidamana be miGadala yadi fafaliya hiyemu. <sup>2</sup> Yesu wakeya gihobu tu kaliva sa'eyana wayafunena aibo'uveya gitauya be Bana amine gi'ela. <sup>3-4</sup> Bana kalivai-nadi aibo'uveya give'abaga ada keke tamo hakwadi anafaiweya bulava againe ginayogoni, higa-wayoga. Fa'ina bulava kainumula nonogana gidobona. E, nimana kadu agena bulava kainumula againe hiyogoyogona tova a gavaiyehi tu gififaiwala be bulava nimane gi'atudobodobona,

kadu bulava agene gi'utudobodobona. Keke tamo hakwadi anafaiweya ginahawatani, au kaliva moya'aidi gifaiwalahegedi. <sup>5</sup> Bogi uyadayada aibo'uveya kadu oyeya ginunudadana gikovakova'awafatafata, kuga againe tauna gitalatalana.

<sup>6-7</sup> Au kaliva aimo lauveya gi'ela'ela tu Yesu gida'itana ma gimadu Bana agene gi'ibo'ula-mo'a gikova'awafatafata agona lakahina gigayo, “Yesu, O'eni Yaubada Getane-mo'ane Natuna. Gavadi iya agaikuya unagani-yo u'ela? Iya gave'o'ole, Yaubada matane unagahe be higa keke unakive-tavetagigiku.” <sup>8</sup> Hidede amine gigahe fa'ina Yesu yafune gimidigahena gigayo, “O yafune hida kaliva unanuyabuyabuna.”

<sup>9</sup> Bana kaliva gigahe-yo, Yesu gitoliyena gigayo, “Gavaimi a egana?” Bana gigayo, “Aku egana Yo'o, fa'ina ime yafune moya'aima kaliva aluvaiyena.”

<sup>10</sup> Ada Yesu againe give'o'oladona gigayo, “Yafune keke unawavidi be hida fafali hinanuyabuyabuni.”

<sup>11-12</sup> Tu yuwa oya fafaline bawe adi yo'o lakahina adiga hilelele fa'ina yafune hihawayafeyafena higayo, “Udavehimeyema be yuwa bawe agaidiya unawavima-yo analuvaiyedi.” <sup>13</sup> Au gihawahegedi ada yafune kaliva hinuyabuyabuni-yo bawe hiluvaiyedi, au bawe adi yo'o luhei tausani (2,000) amine ma awaloloya hi'otahobu, tobu againe hitowa'alika.

<sup>14</sup> Tu bawe adi tolufolofologahi hi'ota be hina melala-mo'ena kadu awa'awanine mena gaitomai-dina hilukahihiyedi. Ada kaliva vevine hitauya be gavadi gilakayemu-ma hina'itana.

15 Ada Yesu againe hi'ela kaliva wayafunena hi'itana, medede againe gihiyoto u'unu a giyamumu be ana kaleko gi'osena, boi yafune moya'aidi adi egana Yo'o hiluvaiyena-ma kalivainadi. Hi'ita-yo himatautave'ine. 16 Ada badi to'ita gavadi kaliva boi wayafunena kadu bawe agaidiya gilakayemu-ma hilukahihiyena. 17 Ada au hivebutu Yesu higaheya'aya'alina be higa yadi fafali ginanuyabuyabuna.

18 Yesu gina wakeya giyageyage tu kaliva boi wayafunena gihawayafeyafena gigayo, “Iya O buye kadana.” 19 Atu Yesu gihawatana gigayo, “Una ya melaleya be a unuma agaidiya unalukahihi. Gavadi lakahina Kaiwabu o fa'iniya gigugaiyeni kadu gavaiya'amine gi'itanuwakabubuye ma unalukahihiyedi.” 20 Ada au kaliva gina be givebutu gavadi lakahina bana fa'ine Yesu gigugaiyena-ma melala teni adi fafali ana egana Dekafolisi agaidiya gilukahihiyena. Ada kaliva moya'aidi hinogalini-yo hiyaulowoga.

*Yailo natuna kwamayoku yana aulolo kahihina.*

*Madiu 9:18-19 Luke 8:40-42*

21 Yesu wakeya giyage-yo kadu tobuya gidamana ada yuwa fafaline giyemu-yo yo'o lakahi-mo'ena taliyeya himadu Bana againe hivaga'auta. 22-23 Taliyeya gimiyami tu manuwa-abavehawala ana tonagona sa'eyana gi'ela, ana egana Yailo. Ada bana tonagona Yesu gi'ita-yo agene gi'ibo'ula-mo'a gihawayafeyafena gigayo, “Natuku kwamayoku kabi'ona gi'aulolo lakahina



ka'i gina'alika. Uda'ela nima bana againe udasena be gidabwaina, gidamiyami hagihagina.” <sup>24</sup> Au Yesu gilowoga be tonagona buye hina. Ada yo'o lakahina hibwa'ulina hinauna tu Yesu liline hiveve'atuwahega.

*Kwamayoku Yesu ana kaleko bwatana gikibwa'ena kahihina.*

*Madiu 9:20-22 Luke 8:43-48*

<sup>25</sup> Tu kwamayoku sa'eyana yo'o agaidiya ginauna, bana yana vaikohi be dayagina tova moya'aina gimadu-vagata. Tuwaina givebutu gi'u'aulolo ada ginunauwena malamala tuwelo.

<sup>26</sup> Doketa moya'aidi agaidiya ginauna ada yadi lumulamula againe aulolo lakahina ginuhagana. Yana mani matatabuna badi agaidiya gihavaina. Gilulumulamula tu doketa keke adifaiweya, au yana aulolo gitubuga-mo'a. <sup>27</sup> Yesu valeyana ahe ginogalina fa'ina yo'o hinafadiya Bana wamuline gi'ela be ana kaleko bwatana gikibwa'ena. <sup>28</sup> Fa'ina nuwahinagene gigaye gigayo, “Ka'i ana kalekogaga ganakibwa'ena, au ganayamumu.” <sup>29</sup> Gikibwa'eni-yo auhe'ama dayagina gi'agolohina, ada gava wowone gi'ayaunena yana aulolo a gihavaina.

<sup>30</sup> Ada Yesu yana faiwala tamo hakwadi againe gina ma gi'ayaunena, au yo'o hinafadiya gihagavilana gitolilualuva gigayo, “Hakwa'adi aku kaleko gikibwa'eni?”

<sup>31</sup> Ada ana tomuliya higahena higayo, “Yo'o hiveve'atuwahega-ma u'itadi. Gavadi-yo ugahe ugayo, Hakwa'adi aku kaleko gisibutuni?”

<sup>32</sup> Tu Yesu aimo gi'ita'italele be hakwa'adi gikibwa'eni-ma ginalitana. <sup>33</sup> Au kwamayoku gavadi bana againe gilakayemu-ma gihalamaneni-yo yana wamatauta yana wavetatava gilela, Bana agene gi'ibo'ula-mo'a be tauna kahihina matatabuna gilukahihiyena. <sup>34</sup> Gilukahihi gihavaina Yesu gigahena gigayo, “Natuku, uvetumaganeku fa'ina ubwaina. Ya wanuwayamumu unana ya aulolo gihavaimo'ena.”

*Yesu Yailo natuna alikeya gisivemididina.*

*Madiu 9:23-26 Luke 8:49-56*

<sup>35</sup> Yesu aimo gilulukahihi tu kaliva tufoidi Yailo yana manuweya hitauya-ma hiyemu be gigahena higayo, “Natu kwamayoku yawaina gihavaina. Au keke Tovehawala unaluve'avaleni-yo una'aliye-kawowoni.” <sup>36</sup> Yesu bonadi keke gidavenogaleni, au manawa-abavehawala ana tonagona againe gigahe gigayo, “Keke unamatauta, au unavetumaganeku.”

<sup>37</sup> Ada kaliva moya'aidi gihawatadi be keke hinabwa'ulini. Fita ada Yemesa wataina Yoni adi'itotogaga ginauwedi. <sup>38</sup> Bana manawa-abavehawala ana tonagona yana manuweya hiyemu-yo Yesu alika ana butubutu ginogalina, tagiya ve'alulaukuhi. <sup>39</sup> Au manuweya giluku gigahedi gigayo, “Gavai'onayo alika ana butubutu ganogalini? Gavadi-yo wave'alulaukuhi? Kwamana keke gida'alika, au gi'enonuwaulu.”

<sup>40</sup> Ada badi hihawavelaigena. Atu Yesu moya'aidi giwawidi be melaleya hihobu au kwamana tamana hinana kadu tomuliya adi'itoto Bana buye hi'ela-ma vetawana kwamana gidauda-ma againe gilukuwedi. <sup>41</sup> Nimana gi'abina ada gigahena gigayo, “Talida kumi.” Mena gahe ana kaivila bonadeya ma “Natuku, Iya gagahe umidi.” <sup>42</sup> Ada auhe'ama kwamana kwamayoku gimidi ginudadana. Ana malamala ma tuwelo. Hi'ita-yo ase'asedi gi'alilihiwana.

<sup>43</sup> Atu Yesu gihawatadi gigayo, “Keke gaveyao wanavenuwa'atadi, au gahawatami.” Kadu gigayo, “Tamo a'a kwamana wavele be gi'ani.”

## 6

*MiNasaledi Yesu hikilowena.*

*Madiu 13:53-58 Luke 4:16-30*

<sup>1</sup> Yesu Yailo yana fafali gihege tu gina Tauna yana melaleya. Ada ana tomuliya hivebwa'uliyena. <sup>2</sup> Ada sabati againe givebutu manawa-abavehawala ana egana sinagogi againe givehawala. Ada tufoidi moya'aidi yana vehawala hinogalini-yo hiyaulowoga higayo, “Hida hima kaliva-kawowo nonogana givehavehawala. Hida nuwahuya givaina-ma gavana ana inuba? Hai faiwala givaini-yo abaveyaulowoga gififaisewani?” <sup>3</sup> Ide bana kalivai-nadi inubana kahalamanena. Bana Meli natudi, manawa ana to'aiyogona, Yemesa Yosese Yudasi Saimoni tawadi. Kadu nouneyao buye kamimiyami.” Au hidedemi miNasaledi yadi wa'ago'uga buye hive'agahegahe tu hikilowena.

<sup>4</sup> Ada Yesu gigahedi gigayo, “Kaliva moya'aidi Yaubada bonana ana to'awatalatalaina hive'amohimohinena tu tauna yana melala tauna yana yo'o tauna ana unuma kalivai-dina keke hidave'amohimohineni.”

<sup>5</sup> Ada medede againe keke tamo aituha fifiwalana anafaiweya gidafaisewani. Au to'aulolo tufoidiga agaidiya nimana gisena be gisiveyawadi. <sup>6</sup> Ada yana yo'o yadi vetumagana keke fa'ina, giyaulowoga. Ada au melala tulina tulina agaidiya ginunuwaliliuga tu givehavehawala.

*Yesu yana yo'o tuwelo kaliva adi veluga fa'ina gi'iveninisedi.*

*Madiu 10:5-15 Luke 9:1-6*

<sup>7-8</sup> Tu Yesu yana yo'o tuwelo giyowanidi be givebutu luhei luhei amine gi'atuhegedi. Abavehimeya yafune fa'idiya givedi ada hidede amine givehimeyedi gigayo, “Keke tamo gavadi yamina againe wanauweni, keke a'a keke vainuwana keke mani ami foseya wanauweni, au yami aiwalagaga. <sup>9</sup> Ageyafayafa wana'osena kadu ami aikeva sa'eyanaga wana'osena. <sup>10</sup> Hai tonimanuwa yana manuweya ginalukuwemi, medede againe wanamiyami tu wanalowoga-havagi ana toveya. <sup>11</sup> Ka'i melala sa'eyana againe wanayemu tu kaliva keke hinavetobohyanemi ada yami laumamala keke hinavenogaleni digo, mena melalai-nadi wanahegena againe fwayafwaya agemiya wanavagahehegena, higa

Yaubada yana ila'a badi agaidiya ana iya'iyaya.”  
Hidedemi Yesu ana tomuliya givenuwa'atadi.

<sup>12</sup> Ada au hilowoga be hina kaliva moya'aidi agaidiya hilulumamala be higa yadi dewa koyona hinavenikohiyeni-yo Yaubada againe hinahagav-iladi. <sup>13</sup> Yafune moya'aidi hiwavidi ada to'aulolo moya'aidi hibunamidi be higa hisiveyawadi.

*Yoni Tobafitaiso gi'alika.*

*Madiu 14:1-12 Luke 9:7-9*

<sup>14</sup> Tu kini Helodi Yesu ana tomuliya yadi faisewa valeyana ginogalina, fa'ina melala moya'aina agaidiya Yesu ana egana give'aliyahega. Kaliva tufoidi higahegahe higayo, “Bana wadevama Yoni Tobafitaiso gimididi-havagi. Hidema fa'ina abaveyaulowoga tulina tulina giffaisewana.”

<sup>15</sup> Kadu tufoidi higayo, “Bana hima to'awatalatalaina tuwaina ana egana Elaiya.” Kadu tufoidi higayo, “Hida hima Yaubada bonana ana to'awatalatalaina badi to'awatalatalaina tuwaidiyao amine.”

<sup>16</sup> Atu Helodi yadi ve'agahegahe ginogalina againe, gigahe gigayo, “Bana au velemodi Yoni Tobafitaiso. Iya gavehimeya be u'una hinikehegenama kalivai-nadi gimididi-havagi.”

<sup>17-18</sup> Helodi hidedemi gigahe fa'ina boi tobohiyana vavinena adi egana Helodiyasi givaidi ada bana Yoni Helodi gidakeyena gigayo, “Tobohiya Filifi vavinena uluhabuyedi fa'ina, nagi ana ve-himeya keke uda'itave'avini.” Hidedemi Yoni gigahe fa'ina Helodi yana kaliva gi'iveninisedi be Yoni hikive'avina ada hiyogona be deliya

hisena. <sup>19-20</sup> Badi Helodiyasi yadi nuwakoyo Yoni againe hilulu'uyena ada higahegahe vaita kaliva hinaluve'alikana tu higa-wayoga, fa'ina Helodi Yoni give'amohimohinena. Bana Yoni kaliva mahamahalina yana dewa yegayegana ma gihalamanena fa'ina, gilugolegolena. Nuwanuwana Yoni yana laumamala ginanogalina tu ana nogala againe nuwana givegafo'uya'uya.

<sup>21</sup> Helodiyasi himiyami himiyami tu yadi tova hagihagina gilakayemu. Helodi yana tubuga ana toveya yana a'a lakahina gitagova be yana yo'o buye hi'a. Ana toveluga kikaiwabudiyao kadu yana togiyomatana kadu Galili ana kaliva lakahidiyao giyowanidi be hi'ela.

<sup>22</sup> Hivemwavemwamwala tu Helodiyasi natudi kwamayoku giluku yo'o matadiya givagavaga. Helodi ana wakawaka buye himatamatawabuwabu tu nuwadi gikiveyamumu-mo'ena. Au kini kwamayoku gigahena gigayo, “Gavadi gavadi fa'ina unave'o'ola, medema ganavele.” <sup>23</sup> Kadu kwamayoku againe giwonadabadaba gigayo, “Yaubada matane gagahe velema'ena be gavadi gavadi fa'ina unave'o'ola au yaku abavehimeya hafuna amine ganavele.”

<sup>24</sup> Ada ulaulatanina gihobu be gina hinana agaidiya gitolilualuva gigayo, “Gavadi fa'ina ganave'o'ola?” Badi higayo, “Yoni Tobafitaiso u'una ana ainike fa'ina.”

<sup>25</sup> Ada auhe'ama gimaduna Helodi againe giluku give'o'olena gigayo, “Tova adamoya udavehimeya be Yoni Tobafitaiso u'una

hinanikehegeni tu nau'a againe hina'aliyena be bana ali'alikana gana'itana.”

<sup>26</sup> Kini Helodi kwamayoku yana ve'o'ola ginogalini-yo nuwana gikabubu-mo'a tu ana wakawaka moya'aidi matadiya giwonadabadaba fa'ina, keke nuwanuwana yana wonadabadaba bana againe ginayawelini. <sup>27-28</sup> Au yana tolugaviya sa'eyana gimadu'iveninisena be higa Yoni u'una ginanikena be gina'aliyena. Au gina deliya Yoni u'una ginikena ada nau'a againe gi'aliyena be ulaulatanina givelena. Ada ulaulatanina gina hinana givedi. <sup>29</sup> Ada au Yoni ana tomuliya valeyana hinogalini-yo hi'ela wowona hivaina be hinauwena tomohuyehuyeya hihuyana.

*Yesu kaliva faifi tausani give'adi.*

*Madiu 14:13-21 Luke 9:10-17 Yoni 6:1-15*

<sup>30</sup> Tu afositolo Yesu againe hiyewadi gavadi gavadi moya'aina higugaiyena kadu hivehawalayena-ma hivenuwa'atana. <sup>31</sup> Ada kaliva nau ela keke yawaidi fa'ina, Yesu ana tomuliya buye keke adifaiweya hinaveyawai-yo hina'a. Hidema fa'ina Yesu gigahedi gigayo, “Ide'eyaogaga wa'ela be kana melalagaga againe kanaveyawai.” <sup>32</sup> Au wakeya hiyage melalagaga againe hina adikaibe himiyami.

<sup>33</sup> Tu tufoidi moya'aidi yadina hi'itana-ma hi'itayakahidi, ada melala moya'aina agaidiya hitauya agediya himaduna be Yesu ana tomuliya buye magigidi himadubodana.

<sup>34</sup> Yesu wakeya gihobu ada yo'o lakahina gi'itadi-yo gi'itanuwakabubuyedi, fa'ina yadi miyami ana ita'ita va'ita sifi adi to'itave'avina keke ma amine. Au givebutu gaitoma moya'aina fa'ina gikivetuvetunu.

<sup>35</sup> Ginunauwena tu mala gisilavina ada tomuliya Bana againe hi'ela higayo, “Mala a gisilavina ada melalagaga againe kamimiyami. <sup>36</sup> Yo'o una'atuhegedi be melala eda'ufoya kadu awa'awanidi agaidiya hinana adiga hinakimonena.”

<sup>37</sup> Tu Bana gigayo, “Auwe, omi wanave'adi.” Badi higayo, “Hima yo'o lakahina. Hai mani anavaini-yo anana a'a anakimoneni adifata amine? Fa'ina a'a fatana vaita kaliva sa'eyana yana faisewa vaikohi eita fatana amine.”

<sup>38</sup> Au Yesu gigahedi gigayo, “A'a gavaiyehi omi agaimiya? Wana wa'ita.” Ada hina hi'itana againe Yesu hivenuwa'atana higayo, “Beledi kabi'odi faifi kadu igana luhei.”

<sup>39</sup> Hidede amine hivenuwa'ata-yo Yesu giga-hedi be yo'o hinavehimeyedi be higa unuma unuma amine isisi'u againe hinavetoga. <sup>40</sup> Au unuma unuma hanaledi o ka'i fifiti amine hive-toga. <sup>41</sup> Hivetoga-yo a'a faifi kadu igana luhei givaidi digo lobameya gi'italele Tamana againe givesiule, au a'a gikihinehineni-yo ana tomuliya givedi be higa badi yo'o agaidiya hinafolakena. Kadu igana luhei gikihinehinena be moya'aidi agaidiya hifolakena. <sup>42</sup> Ada au moya'aidi hi'a be hi'ahiyauwa. <sup>43</sup> Ada tomuliya hina a'a kadu igana ana tufo kwadakwada hikwakwana againe



feyawa tuwelo hivemagadi. <sup>44</sup> Badi kaliva a'ai-nadi hi'a-ma adi kilagalaga au 5,000.

*Yesu ni'u getane ginudadana.*

*Madiu 14:22-23 Yoni 6:16-21*

<sup>45</sup> Tu tomuliya kwadakwada hikwakwana gihavaina, auhe'ama Yesu gigahedi be wakeya hinayage wai hinanagona be yuwa fafaline melala ana egana Bedasaida againe hinamididamana tu Bana Tauna ginamiya be yo'o gina'atuhegedi. <sup>46</sup> Ada ahe gilukafoiyedi-yo oyeya gilaka be Tamana againe ginave'o'ola.

<sup>47</sup> Ada au mala gibogi-mo'a tu badi tomuliya wakeya wese gawaneya hinauna tu Bana'e ma anakaiibe avaleya gimiyami. <sup>48</sup> Bolimana lakahina gimadu be waka giluluveyeveyewana fa'ina tomuliya hiwoifaiwala-wayoga ma Yesu gi'itadi. Ada mala kabisona ginalauna tu Yesu badi agaidiya gi'ela'ela, ni'u getane ginunudadana tu au ginanu'atuvagavaga.

<sup>49</sup> Tu Yesu ni'u getane ginunudadana ma hi'ita-yo hitatawayana hivaitana balauma hida'itani. <sup>50</sup> Fa'ina tomuliya moya'aidi hi'itana be himatautave'ine. Auhe'ama gigahedi gigayo, "Wa'asevatu. Hima Iya ga'ela'ela, keke wanamatauta."

<sup>51-52</sup> Ada Bana badi agaidiya wakeya giyage-yo bolimana gi'atagona. Ada hiyaulowoga-mo'a, fa'ina Yesu yana faiwala a'a ana kivetubuga againe keke hida'itahalamaneni, nuwadi au abodana.

---

**6:44:** Lu 10:17 Md 9:36 Mk 8:1-9

**6:51-52:** Mk 1:35, Lu 5:16,

6:12 Lu 24:36-37 Mk 8:17

*Yesu to'aulolo Genesaleda againe gisiveyawadi.*

*Madiu 14:34-36*

<sup>53</sup> Tu tobuya hidamana'ela-yo fafali ana egana Genesaleda againe hihobu waka hiluhifona. <sup>54-55</sup> Wakeya hidahobu ma kaliva Yesu hi'itayakahina ada medema awa'awana melalina moya'aina agaidiya himaduna, hivebutu to'aulolo adi wa'ivi hiwahidi ada hai Yesu gimiyami valeyana hinogalina, medede againe hi'aliyedi. <sup>56</sup> Ada au hai Yesu gi'ela'ela ka'i melala kabi'ona o lakahina o ka'i awa'awanine, medede againe to'aulolo hi'aliyedi be melala hinafane hisedi ada hihawayafeyafena be higa to'aulolo ginahawahegedi be ana kaleko bwatanaga hinakibwa'ena. Ada gaveyao moya'aidi hikibwa'ena, medema hiyamumu.

## 7

*Yaubada yana vehimeya bwanenedeyao yadi dewa*

*gitubuhegena.*

*Madiu 15:1-9*

<sup>1</sup> Tova sa'eyana tonagona tafatafalolodiyao adi egana Falisi kadu Mosese yana vehimeya ana tovehawala Yelusalema againe hitauyama Yesu againe hivaga'auta. <sup>2</sup> Himiyami tu ana tomuliya tufoidi hi'itadi adiga hi'au'a wanimabwanenedi, higa nimadi keke hidakolani Falisi yadi tafalolo-vehimeya amine. <sup>3</sup> Fa'ina badi Falisi kadu miYuda moya'aidi bwanenediyao yadi dewa himulimuliyena. Keke hidamidi'a

tu nagona nimadi hicolana tafalolo-vehimeya amine. <sup>4</sup> Ka'i abakimokimone amine hinatauya keke hinamidi'a tu nagona adi kivebuta hinafaisewana. Ada kadu dewa tuwaina moya'aina hi'ita'itave'avina, higa gowa aba'aihiwaga nau'a kainumula ana ikolakola tafalolo-vehimeya amine.

<sup>5</sup> Au Falisi kadu Mosese yana vehimeya ana tovehawala Yesu hitoliyena higayo, “Gavadi-yo a tomuliya bwanenedeyao yadi dewa amine keke hidahuluhuluva? Fa'ina wanimabwanenedi hi'au'a.”

<sup>6</sup> Yesu gigayo, “Wona velemona tuwai-mo'ena Yaubada bonana ana to'awatalatalaina ana egana Aiseya omi meyami lagalaganina fa'imiya gigaheye-vagahina, ada au yana buki againe gigahe velemono'ena gigayo,  
Hida yo'o miIsileli kebuladiya  
hive'amohimohineku  
tu ase'asedi Iya agaikuya keke hidahawahegeni.

<sup>7</sup> Iya agaikuya hihawadavadava-kawowo. Yadi hewawala ma taudiyao yadi vehimeya hiki-lakahina,  
ada hivewagana Iya Yaubada yaku vehimeya.”  
Hidedemi Yaubada Aiseya awane gigahe tu Yesu Aiseya yana gahe giyakahina.

<sup>8</sup> Kadu gigayo, “Omi Yaubada yana vehimeya wadibudibutoyogena tu kaliva yadi dewa tuwaina againe wamiyave'avina.” Hidemi Yesu gigahe.

<sup>9</sup> Kadu'e gigayo, “Wawaitana omi nuwahuyahuyamiyao be'ena taumiya yami dewa tuwaina wa'ita'itave'avina ada au Yaubada yana vehimeya wasehegena. <sup>10</sup> Yaubada bana

Mosese awane givehimeyeda gigayo, Tama be hina unave'amohimohinedi. Kadu vehimeya sa'eyana ma, Gava kaliva tamana o ka'i hinana gina'ihawadamanedi, medema anafaiweya gida'alika. <sup>11-13</sup> Tu omi'iyao ma wagahe vaita ka'i kaliva tamana o hinana ginagahedi ginagayo, Gavadi gavadi againe vaita gadavelugami, medema Yaubada againe gahawahegena. Ka'i hidede amine ginagahe digo, omi wahawatana be keke tamo lokoloko, a'a o ka'i gava'adi againe tamana hinana ginavelugadi. Au mena yami hawata fa'ina Yaubada yana vehimeya tamamiyao o hinamiyao adi ve'amohimohina fa'ina wayawelina be higa taumiyao yami vehawala wanakilakahina. Kadu kaliva moya'aidi hidede amine wahawaveleveledi. Mena yami vehawala sa'eyana gayakahina tu vehawala moya'aina againe meda anafaiweya Yaubada yana vehimeya wayawelina-ma keke gadayakahini.”

*Gavadi kaliva ase'asene gidadauda medema gikivekoyona.*

*Madiu 15:10-20*

<sup>14</sup> Tu Yesu yo'o gikova-havagiledi be Bana liline hi'ela ada gigahedi gigayo, “Moya'aimi bonaku wanalogalina be wanahalamanena. <sup>15</sup> Keke gavadi kabu'avane gidadauda-ma kaliva awane ginaluku-yo Yaubada matane ginakivekoyoni. Atu gavadi kaliva hinagene gidadauda tu kabu'avane ginayemu, medema Yaubada matane

ginakivekoyona. [ <sup>16</sup> Hai kaliva taga afolegina, medema bonaku udavenogalena.] ”

<sup>17</sup> Hidede amine Yesu gigahe tu yo'o gihegedi be giluku manuweya, au ana tomuliya yana gahetalahobuhobu fa'ina hitoliloveluvena. <sup>18-19</sup> Ada gigahedi gigayo, “A! Omi kadu tagami keke gida'afoleni. Wanogali! Gavadi kabu'avane gidadauda-ma kaliva awane ginaluku, medema keke Yaubada matane ginakivekoyoni, fa'ina keke ase'asene gidaluku, au kamone gihobu be wala'aiya gihegena.” Mena yana gahe againe Yesu givewaleda keke tamo a'a hawahawatana, au a'a moyo'aina hagihagina.

<sup>20</sup> Kadu gigayo, “Gavadi gavadi kaliva againe hiyemuyemu, medema gaitomai-dina Yaubada matane hikivekoyona. <sup>21-22</sup> Fa'ina gavadi kaliva nuwahnagene gidadauda, higa gavadi gavadi koyona ase'asene ginuwenuwedi, medema yana dewa againe giseyemaunedi, nuwanuwa koyona, udo tulina tulina, kai'afu luv'e'alika kelele italu-vadiga, dewa koyo-mo'ena, fwaya vehimeya ana ivehawavelaiga, ga'uma'uma veyaina selakalaka, dewa kwavakwavana. <sup>23</sup> Mena dewai-dina koyodi moyo'aidi kaliva nuwahnagene hidadauda-yo yana dewa againe giseyemaunedi be Yaubada matane hikivekoyona.” Hidedemi Yesu gikive-tunudi.

*VinemiFinisiya Yesu hivetumaganeni-yo natudi giyamumu.*

*Madiu 15:21-28*

<sup>24</sup> Tu Yesu mena melalai-nadi gihegena ana tomuliya buye hina Taiya Saidoni adi fafali againe. Manuwa sa'eyana againe giluku, ada Bana medede againe gimiyami-ma keke nuwanuwana tamo hakwadi ginahalamaneni, tu keke anafaiweya sevasevauyana ginamiyami.

<sup>25</sup> Au kwamayoku sa'eyadi himiyami natudi kwamayoku kabi'ona yafune giluvaiyena, ada Yesu valeyana hinogalini-yo Bana againe himaduna agene hi'ibo'ula-mo'a.

<sup>26</sup> Badi kwamayoku ma hawahawala keke vinemiYuda, melala ana egana Finisiya, Siliya ana fafali againe hitubuga. Ada Yesu hihawayafeyafena be yafune natudi giluvaiyena-ma ginawavina.

<sup>27</sup> Bana gigahedi gigayo, “MiYuda badi vaita we'owe'o amine ganamidive'adi, fa'ina ka'i we'owe'o adiga ganavaina be yo'o tulidiyao badi vaita galu'eta amine ganahegeve'abidi digo, medema keke gidalubodani.”

<sup>28</sup> Badi higayo, “Ika Kauveya, ugahe velemo'ena. Atu galu'eta tolama dibune we'owe'o adiga kwadakwadana gibe'ube'u-ma hi'au'ana.”

<sup>29</sup> Au gigahedi gigayo, “Yami wavetu-magana bonaku wafatana fa'ina wanana yami manuweya. Yafune natumi ahe ginuyabuyabuna.”

<sup>30</sup> Ada au hina yadi manuweya ada kwamana iviya gidauda-ma hinuhagana tu yafune a gina.

*Yesu kaliva tagana abodana meyana daluna gisiveyawana.*

<sup>31</sup> Tu Yesu Taiya ana fafali gihegena ada gina Saidoni hinafane ginauna tu melala teni adi egana Dekafolisi amidiya ginuwaliliuga be Galili ana tobuya gihobu. <sup>32</sup> Medede againe kaliva sa'eyana Bana againe hi'aliyena tagana abodana kadu meyana daluna. Ada hihawayafeyafena be ni-mana bana againe ginasena.

<sup>33-34</sup> Au Yesu kaliva gisi'aliyeni tu yo'o himiyave-haila, ada nimalagolagona kaliva tagane gisena, kadu gikiwala be kaliva meyana gikibwa'ena digo lobameya gi'italele au giyawai'ohi lakahina tu gigahena gigayo, “Efafada.” Ana kaivila bonadeya ma “Gi'ayau.” <sup>35</sup> Gigahe-yo auhe'ama kaliva tagana gi'afolena, meyana gi'ayagilina ada gilukahihi yamumuna.

<sup>36</sup> Au Yesu yo'o gihawatadi be keke tamo hak-wadi againe hinalukahihiyeni. Gihawatadi a gavaiyehi tu badi tova moya'aina hilulukahihiyena. <sup>37</sup> Ada au hiyaulowogahega-mo'a higayo, “Gaitoma moya'aina gififaisewana yamumuna. Kaliva tagadi abodana meyadi daluna nonogana anafaiweya gikiveyamumudi.”

## 8

*Yesu kaliva fowa tausani give'adi.*

*Madiu 15:32-39*

<sup>1-3</sup> Kadu tova sa'eyana yo'o lakahina hivaga'auta be Yesu yana vehawala hinanogalina. Himiyami tu adiga gihavaina fa'ina, Yesu ana tomuliya giyowanidi be hi'ela yana hinekalikali yo'o agaidiya giyemaunena gigayo, “Hida kaliva

vevine hagihagidiyao. Aiyeta tohiye badi Iya buye amimiyami tu adamoya adiga keke. Ada ka'i mafu gilaudi tu gana'atuhegedi be hinana yadi melaleya, au edeya matadi ginaluwaliwaliliuga be hinabe'u, fa'ina tufoidi lauveya hi'ela.”

<sup>4</sup> Ana tomuliya higayo, “Melalagaga againe kamimiyami. Ha'againa a'a kanavaini-yo hida yo'o lakahidi kanave'adi?”

<sup>5</sup> Yesu gigayo, “A'a gavaiyehi omi agaimiya gidadauda?” Badi higayo, “We'a beledi kabi'odi seveni.”

<sup>6</sup> Higaha-yo yo'o givenuwa'atadi be babiya hinavetoga. Hivetoga tu Yesu a'a seveni givaidi digo Tamana againe givesiule gikihinehinedi, au ana tomuliya givedi be yo'o agaidiya hinafolakena. Ada au hifolakena. <sup>7</sup> Kadu igana kabi'odi tufoidi badi agaidiya gidauda. Ada Yesu givaidi be kadu Tamana againe givesiule-yo ana tomuliya givehimeyedi be yo'o agaidiya hinafolakena. <sup>8</sup> Au badi hi'a be hi'ahiyauwa. Ada tomuliya hive'adi tu adi tufo kwadakwadana feyawa seveni hivemagana. <sup>9-10</sup> Ada badi kaliva hi'a-ma adi kilagalaga 4,000. Ada Yesu gi'atuhegedi-yo ana tomuliya buye wakeya hiyage be hina Dalimanuda ana fafali againe.

*Falisi aituha fifiwalana fa'ina hive'o'ola.*

*Madiu 16:1-4*

<sup>11</sup> Tu tonagona tafatafalolodiyao adi egana Falisi tufoidi Yesu againe hi'ela be hivebutu hivekwageyena. Nuwanuwadi hinavebauna fa'ina hive'o'olena be tamo aituha fifiwalana



ginafaisewana, higa vaita Yaubada againe gidave'inuba. <sup>12</sup> Ada Yesu nuwahinagene giyawai'ohi tu gigahe gigayo, “Gavadi-yo omi kaliva tova adamoya babiya watubuyemu-ma nimaku ana iya'iyaya waleleleni? Gagahe velemo'ena keke tamo iya'iyaya ganafaisewani-yo higa medede againe inubaku wanahalamaneni.” <sup>13</sup> Ada hidedemi gigahedi-yo gihegedi be kadu ana tomuliya buye wakeya hiyage-havagi, hivebutu yuwa fafaline hidamana.

*Falisi kadu Helodi yana yo'o kalivadi yadi gahe*

*vaita isi amine.*

*Madiu 16:5-12*

<sup>14</sup> Hiyage tu ana tomuliya nuwadi giulu be keke tamo a'a hidanauweni, au beledi kabi'ona sa'eyanaga wakeya gidauda. <sup>15</sup> Au Yesu givenuwa'atadi gigayo, “Taumiyo wana'itave'avimi be Falisi kadu Helodi yana yo'o kalivadi yadi isi keke nuwami ginavaini.”

<sup>16</sup> Ada badi tomuliya hivebutu buye hive'agahegahe higayo, “Keke tamo a'a agaideya fa'ina hidedemi gigahe.”

<sup>17</sup> Yesu yadi nuwanuwa gihalamanena fa'ina gigahedi gigayo, “Gavadi-yo a'a nuwami giuluma fa'ina buye wave'agahegahe? Ka'i tagami aimo keke gida'afoleni-yo halamana wadavaini? Ka'i nuwami aimo abodana? <sup>18</sup> Omi wamatami tu keke wada'itahalamaneni. Omi watagami tu keke wadanogalini. Vaita yo'o-hala luhei adi ve'a nuwami gida'afoleni. <sup>19</sup> A'a faifi kaliva faifi

tausani fa'idiya gakhinehinena ana toveya, adi tufo wakwakwa feyawa gavaiyehi?" Badi higayo, "Feyawa tuwelo."

<sup>20</sup> Bana gigayo, "Kadu a'a seveni kaliva fowa tausani fa'idiya gakhinehinena ana toveya, adi tufo wakwakwa feyawa gavaiyehi?" Badi higayo, "Feyawa seveni."

<sup>21</sup> Kadu gigahedi gigayo, "Gavadi-yo halamana aimo keke wadavaini? 5,000 o 4,000 gave'adi amine, omi kadu akufaiweya ganave'ami."

*Yesu tomatakoyo Bedasaida againe gisiveyawana.*

<sup>22</sup> Tu Yesu ana tomuliya buye Bedasaida againe hiyemu tu kaliva tufoidi tomatakoyo sa'eyana Yesu againe hi'aliyena ada hihawayafeyafena be ginakibwa'ena. <sup>23</sup> Au Yesu tomatakoyo nimane gi'abina be ginauwena melala kwaune. Kaliva matane gikiwala ada nimana bana againe giseni-yo gitoliyena gigayo, "Ka'i mene tamo gavadi afaiweya una'itana?"

<sup>24</sup> Kaliva gi'italele gigayo, "Ehe, kaliva ga'itadi tu adi ita vaita ai hidanunaudadana."

<sup>25</sup> Kadu Yesu nimana kaliva matane gisehavigilena ada kaliva gi'itadona, ada au giyamumu be gaitoma moya'aina gi'itahagihagiyena.

<sup>26</sup> Ada Yesu gi'atuhegena gigayo, "Unana ya manuweya. Keke Bedasaida melaleya unaluku."

*Fita Yesu inubana fa'ina gihawavemogatala.  
Madiu 16:13-20 Luke 9:18-20*

<sup>27</sup> Tu Yesu gilowoga be Sisaliya-Filifai melalina amine ana tomuliya buye hina. Edeya hinauna tu gitoliluveluvedu gigayo, “Iya inubaku fa'ina kaliva gavaimi higahe? Iya vaita hakwa'adi?”

<sup>28</sup> Ada badi higayo, “Tufoidi higahe vaita O Yoni Tobafitaiso. Kadu tufoidi higahe vaita O Yaubada bonana ana to'awatalatalaina ana egana Elaiya. Kadu tufoidi higahe vaita O Yaubada bonana ana to'awatalatalaina kadu sa'eyana.”

<sup>29</sup> Ada gitoliyedi gigayo, “Tu omi'iyao Iya vaita hakwa'adi ma gavaimi wagahe?”

Fita gigahena gigayo, “O'eni Yaubada yana Tovegida higa Keliso.”

<sup>30</sup> Au gihawatadi be Bana inubana fa'ina keke tamo hakwadi againe hina'awatalatalaina.

*Yesu yana aulolo yana alika fa'ina gigaheye-vagahina.*

*Madiu 16:21-23 Luke 9:21-22*

<sup>31</sup> Medema tovai-nadi Yesu givebutu ana tomuliya givehawaledi gigayo, “Iya Tohobu'ela aku vehimeya gavaina, higa aulolo moya'aina kaliva nimadiya gananuhagana. Badi kaliva lakahidiyao kadu abaveyao ana tofaisewa kikaiwabudiyao kadu Mosese yana vehimeya ana tovehawala hinakiloweku. Au kaliva hinaluve'alikaku tu aiyeta tohiye kanahegeni-yo au ganamididi-havagi.”

<sup>32-33</sup> Ada mena yana aulolo yana alika fa'ina gigahemata'atadi. Au Fita gisi'aliyeni-yo givebutu gidakeyena tu Yesu gihagavilana ana tomuliya gi'itadi tu Fita gidakeyena gigayo, “Setani o una

kwaukuya. Mena ya nuwanuwa ulukahihiyena-ma keke Yaubada yana nuwanuwa. Au ya nuwanuwa tomiyababi yadi nuwanuwa amine.” Hidedemi Yesu Fita gidakeyena.

*Yesu ana muliya fa'ina vita kananuhagana.*

*Madiu 16:24-28 Luke 9:23-27 Yoni 12:23-26*

<sup>34</sup> Ada yo'oyo'o kadu ana tomuliya buye giyowanidi be Bana againe hi'ela gigahedi gigayo, “Gava kaliva nuwanuwana tavagiku ginamafuna, medema gilubodana be tauna yana nuwanuwa gidavenuwauluyena ada Iya agaikuya gidavetomuliya-yo gidahawahegena be vita tulina tulina gidanuhagana. <sup>35</sup> Ada gava kaliva keke nuwanuwana Iya agaikuya ginahawahegeni tu taunaga fa'ine tova moya'aina ginuwanuwa, medema yawaina ginanuhegena. Atu gava kaliva Iya givetumaganeku be yaku Venuwa'ata Yamumuna gilumamalena fa'ina yawaina ginanuhegena, medema yawai-vagahina ginanuhagana. <sup>36</sup> Ka'i kaliva babi ana lokoloko matatabuna ginavai-'owona tu tauna alu'aluwana yana miya hagihagina ginanuhegena digo, keke tamo gavadi hagihagina ginanuhagani. <sup>37</sup> Ka'i alu'aluwana yana miya hagihagina ginanuhegena digo, keke tamo laufata anafaiweya ginaseni-yo yawaina kadu ginanuhagani. <sup>38</sup> Kaliva vevine tova adamoya babiya hitubuyemu-ma kaliva koyodi, keke Yaubada againe hidamiyave'avina. Hai kaliva o yaku kaliva be bonaku uvetumaganena ma keke nuwanuwa badi yo'o matadiya unahawavemogataleni yadi hawavelaiga

umatausena fa'ina, medema fa'iniya aimo tova mulina Iya keke ganagahe vaita o yaku kaliva. E, Iya Tohobu'ela Kamaku yana wakikaiwabu yana tovenuwa'ata mahamahalidiyao buye anayewa'ela ana toveya, o fa'iniya keke ganagahe vaita o yaku kaliva.” Hidemi Yesu yo'o kadu ana tomuliya gigahedi.

## 9

<sup>1</sup> Kadu gigahedi gigayo, “Gagahe velemo'ena, tufoimi hidedei wamidimidi-ma aimo keke alika wanunuhagani tu nagona Yaubada givebutu yana yo'o ase'asediya yana wafaiwala givehivehimeya ma wana'itana.”

*Yesu lobama ana nuya kikaiwabuna gi'osena.*

*Madiu 17:1-13 Luke 9:28-36*

<sup>2</sup> Aiyeta sikisi himiyami tu Yesu Fita kadu Yemesa watobohiyana Yoni adi'itotogaga ginauwedi be oya lakahina againe gilakavedi. Ada medede againe wowona ana ita tulina gilakayemu.

<sup>3</sup> Au ana kaleko give'akinamanamalena kadu gikwaya-mo'ena, vaita keke tamo hakwadi babiya gimimiyami-ma anafaiweya gidakolani. <sup>4</sup> Ada Yaubada yana kaliva tuwai-mo'ena himiyami-ma adi egana Mosese kadu Elaiya badi matadiya hihobu'ela Yesu buye hilulukahihi.

<sup>5</sup> Ada Fita Yesu gigahena gigayo, “Yaku Tovehawala, ime hidedei amimiyami ma gilubodana. Vada tohiye anayogodi, sa'eyana O fa'iniya, sa'eyana Mosese fa'ine kadu sa'eyana Elaiya fa'ine.” <sup>6</sup> Hidede amine gigahe fa'ina vaita

gavaimi ginagahe keke gidahalamaneni fa'ina bana'e tobohianeyao buye himatautave'ine.

<sup>7</sup> Au buhibuhi tomuliya adi'itoto giwa'utagodi, ada buhibuhi hinagene ago'ago sa'eyana hino-galina gigayo, “Bana hidevama Natu'ase'aseku. Au bonana wanavenogalena.” <sup>8</sup> Ada auhe'ama hi'italele ada keke tamo hakwadi hida'itani. Au Mosese Elaiya hina tu Yesu anakaibe badi buye himiyami.

<sup>9</sup> Ada oyeya hitauya hihobuhobu'ela tu Yesu gihawatadi gigayo, “Tova adamoya yami ita fa'ina keke tamo hakwadi againe wanahawavemogatala. Aimo Yaubada Iya Tohobu'ela alikeya ginasivemididiku againe, au wanahawavemogatalena.” <sup>10</sup> Yadi ita keke tamo hakwadi againe hidalukahihiyeni tu taudiyaogaga buye hive'agahegahe higayo, “Alikeya ginamididi-havagi ma gavaimi ana nuwanuwa?”

<sup>11</sup> Ada Yesu hitoliyena higayo, “Gahe anogalina higa vaita Elaiya ginamidilakayemu tu muliya Yaubada yana Tovegida ginayemu. Gavana fa'ina Mosese yana vehimeya ana tovehawala hidede amine higahegahe?”

<sup>12</sup> Yesu gigahedi gigayo, “Makewa Elaiya ginamidiyemu be Kaiwabu yana eda ase'ase miya ginakidewedeweni-yo muliya Yaubada yana Tovegida ginalakayemu. Atu Yaubada bonana eto'etoladina Iya Tohobu'ela fa'ikuya gavaimi gigahe? Gigahe vaita aulolo moya'aina gananuhagana be kaliva hinakiloweku. <sup>13</sup> Ada Iya gagahemi, bana kaliva vaita Elaiya amine ahe gilakayemu ada kaliva gavaimi

hinuwanuwa amine hikivekoyona, Yaubada bonana eto'etoladina tuwai-mo'ena Elaiya fa'ine gigahe amine.” Hidedemi Yesu gikivetuvetunudi.

*Yesu kwamana wayafunena gisiveyawana.*

*Madiu 17:14-21 Luke 9:37-43*

<sup>14</sup> Tu Yesu ana tomuliya adi'itoto buye oyeya hihobu tomuliya velugadiyao agaidiya hihobu'elayo yo'o lakahina himidifidi-ma hi'itadi, kadu Mosese yana vehimeya ana tovehawala buye hivekwavekwageya-ma hi'itadi. <sup>15</sup> Ada kaliva moya'aidi Yesu hi'ita-yo hiyaulowoga-mo'a, ada Bana againe himadu be hinalusiuleyena.

<sup>16</sup> Ada Yesu ana tomuliya gitoliyedi gigayo, “Gavadi fa'ina wavekwageyedi?”

<sup>17</sup> Ada kaliva sa'eyana yo'o agaidiya gigahena gigayo, “Tovehawala, natuku kaliva O againiya ga'aliyena fa'ina yafune giluvaiyeni-yo agona gisebodana. <sup>18</sup> Yafune gi'abi'abina ana toveya, babiya gibaibaina ada awabugo gi'ala'alahiwahiwagena gadona giveve'atalaweno luluna gitoyotoyoga. Ada a tomuliyamomo gave'o'oledi be yafune hinawavidi tu keke adifaiweya.”

<sup>19</sup> Au Yesu gigahedi gigayo, “Omi kaliva tova adamoya watubuyemu-ma keke ma'ita wadavetumaganeku. Malamala gavaiyehi omi buye kanamiyami tu yami vetumagana ginayemu? Malamala gavaiyehi keke wanavetumaganeku tu gana'atuvefa'ilemi? Au kwamana wa'aliye we'ai.”

<sup>20</sup> Au kwamana Bana againe hi'aliyena. Ada yafune Yesu gi'ita-yo auhe'ama kwamana gikivefavefanina. Au babiya gibe'u gi'eno'eno-bwatabwatavilani tu awabugo giwahitoyogena.

<sup>21</sup> Ada Yesu kwamana tamana gitoliyena gigayo, “Gava tova givebutu hidede amine gihuluhuluva?” Bana gigayo, “Tuwaina kabi'one givebutu. <sup>22</sup> Ada tova moya'aina yafune aiya o ka'i gufeya givebevebe'una be ginaluve'alikana. Atu ka'i afaiweya digo, unahinekalikaliyema be unavelugama.”

<sup>23</sup> Yesu gigahena gigayo, “Gavadi-yo afaiweya uyakahini? Hai kaliva ginavetumaganeku, medema gaitoma moya'aina anafaiweya ginafaisewana.”

<sup>24</sup> Auhe'ama kwamana tamana gikova gigayo, “O gavetumagane. Atu yaku vetumagana kabi'ona fa'ina udavelugaku be gidatubuga.”

<sup>25</sup> Yesu yo'o hi'abiyemuyemu-ma gi'itadi againe yafune gidakeyena gigayo, “O yafune kwamana tagana u'ive'abodana agona usebodana-ma gave-himeye be kwamana unanuyabuyabuna. Keke-mo'a unaluvaiye-havagileni.” <sup>26</sup> Gigahe-yo yafune gitatawayana kwamana gikivefavefanidoneni tu ginuyabuyabuna. Ada kwamana ana bela vaita alika amine fa'ina moya'aidi higayo, “Kwamana a gi'alika.” <sup>27</sup> Atu Yesu nimane gisilakahina be gimidi.

<sup>28</sup> Ada muliya Yesu manuweya giluku-yo ana tomuliya adikaibe'uyanina Bana buye himiyami tu hitoliluveluvena higayo, “Gavana fa'ina ime keke amafaiweya wada yafune-nadi adawavini?”



<sup>29</sup> Yesu gigayo, “Mena yafune adi loi yadi faiwala lakahi-mo'ena fa'ina keke amifaiweya wanawavi-kawowodi. Au wanave'o'ola-fa'ila kadu au ana tova againe wanamiyami be Yaubada wanave'o'olena amine, amifaiweya wanawavidi.” Au hidede amine Yesu gikivetuvetunudi.

*Yesu yana alika yana mididi-havagi fa'ina gilukahihi-havagi.*

*Madiu 17:22-23 Luke 9:44-45*

<sup>30</sup> Medema melalai-nadi hihege tu Galili ana fafali hinafane hinauna, ada Yesu keke nuwanuwana hai gimiyami-ma kaliva hinahalamaneni. <sup>31</sup> Keke nuwanuwana hinahalamaneni fa'ina ana tomuliya givhavehawaledi gigayo, “Iya Tohobu'ela makewa kaliva nimadiya hinahegenauweku be hinaluve'alikaku. Atu aiyeta anaveto againe Yaubada alikeya ginakivemididiku.” <sup>32</sup> Hidede amine Yesu gigahe tu ana tomuliya mena yana gahe ana nuwanuwa hifaniyena, ada himatauta fa'ina keke hidave'o'ola be higa ginakivetuvetunudi.

*Hakwadi kikaiwabuna Yaubada matane?*

*Madiu 18:1-5 Luke 9:46-48*

<sup>33</sup> Hinauna tu Kafeneumi againe hiyemu. Ada manuweya hiluku-yo Yesu ana tomuliya gitoliyedi gigayo, “Gavadi-yo edeya buye wavekwavekwageya?” <sup>34</sup> Tu badi hive'amata. Fa'ina edeya hinauna tu hakwadi badi agaidiya

kaiwabu againe wai ginago-mo'ena ma buye hivekwavekwageyena.

<sup>35</sup> Ada Yesu givetoga be yana yo'o tuwelo gikovavaga'auhidi gigahedi gigayo, “Gava kaliva nuwanuwana kaiwabu againe wai ginanagona, medema gidanuwahobu be wai gidamulina kadu tobohiyaneyao agaidiya gidavetofaisewa.”

<sup>36-37</sup> Ada Yesu kwamana kabi'ona givaina digo ana tomuliya hinafadiya gisena, ada au gifewana be giwahina gigahedi gigayo, “Hai kaliva kwamana kabi'ona bana hidevama amine aku eganeya ginasive'auyena, medema vaita Iya ginasive'auyeku. Ada hai kaliva Iya ginasive'auyeku, medema keke vaita Iya'ekugaga gidasive'auyeku, au vaita Bana'e gi'iveniniseku-ma buye gidasive'auyema.” Hidedemi Yesu gikivetuvetunudi.

*Gava kaliva keke nibaida, medema higa vaita tobohiyada.*

*Luke 9:49-50*

<sup>38</sup> Bana Yoni gigahena gigayo, “Tovehawala, kaliva sa'eyana a'itana a eganeya yafune giwawavidi, ada bana keke yada yo'o kalivana fa'ina ahawatana.”

<sup>39</sup> Atu Yesu gigahe gigayo, “Keke wanahawatani, fa'ina hai kaliva aituha fifiwalana aku eganeya gifaisewana, medema aimo keke anafaiweya ginamadu-hawavekoyoyeku. <sup>40</sup> Au gava kaliva keke ada nibaina, medema tobohiyada. <sup>41</sup> Gagahe velema'ena gava kaliva omi Iya Keliso yaku kaliva fa'ina ginanuwakabubuyemi be gufa-abayuyu

ginavelemi, medema wona velemona ana laufata ginavaina.

*Keke kaliva koyona againe kanavebe'udi.*

*Madiu 18:6-9 Luke 17:1-2*

<sup>42</sup> Tu ka'i kaliva sa'eyana vaita kwamana amine givetumaganeku-ma dewa koyona againe wanavebe'una, au vita lakahina wananuhagana. Ka'i kuga vita-mo'ena odomiya hinaluhifona be lehageya hinahegehobuyemi-yo wana'alika, medema vitana. Atu ka'i matahiwadi Yaubada againe ginanuhagana, au medema vita-mo'ena. <sup>43-46</sup> Ka'i nima koyona againe ginavebe'u, au unanikehegena. Ka'i nima fafalatamo unamiyami tu lobameya unaluku, au medema vita kabi'ona. Atu nima luhei unamiyami tu abaga koyona againe unaluku, au medema vita lakahi-mo'ena. Kadu ka'i age koyona againe ginavebe'u, au unanikehegena. Ka'i age fafalatamo unamiyami tu lobameya unaluku, au medema vita kabi'ona. Atu age luhei unamiyami tu abaga koyona againe unaluku, au medema vita lakahi-mo'ena. <sup>47</sup> Ka'i mata koyona againe ginavebe'u, au unamwamwalina. Ka'i mata fafalatamo unamiyami tu Yaubada yana yo'o lobameya unaluku, au medema vita kabi'ona. Atu mata luhei unamiyami tu abaga koyona againe unaluku, au medema vita lakahi-mo'ena. <sup>48</sup> Abaga koyona againe nawabuluma tokoyona wowodi hina'au'ana tova inaga inaga, ada ai gi'alata-vagata fa'ina yadi aulolo keke ginahavaini. <sup>49</sup> Aulolo tulina tulina

vaita ai ala'alata amine omi kaliva moya'aimi gina'alahi-luvaluvami be yami dewa vaita lehaga yamumuna amine giludigadigaga o ka'i keke ma ginaseyemaunena.

<sup>50</sup> Lehaga gaitoma hagihagina. Ka'i kanahiwavekibona, ana digadigaga ginahavaina ada keke adafaiweya kanakivedigagi-havagileni. Lehaga a'a againe kadodona be giludigadigaga amine, meda omi yami gahe wanakivedigagina be veyao againe tobohiyamiyao buye wanamiyami.”

## 10

*Yesu vevine adi kilowa fa'ina givehawala.*

*Madiu 5:31-32, 19:1-12 Luke 16:18*

<sup>1</sup> Tu Yesu Kafeneumi gihege tu Yudiya ana fafaliya gina be yuwa Yolidani fafaline gidamana, ada kaliva Bana againe kadu hiyo'oyo'o. Ada yana dewa tova moya'aina amine kadu givehave-hawaledi.

<sup>2</sup> Tu tonagona tafatafalolodiyao adi egana Falisi tufoidi Bana againe hi'ela. Nuwanuwadi hinave-bauna fa'ina hitoliluveluvena higayo, “Gavaimi unuwanuwa? Ka'i kaliva nuwanuwana vavinenena ginakilowena, yada buki-vehimeya gihawahegena o ka'i keke?”

<sup>3</sup> Yesu gigayo, “Tuwai-mo'ena Mosese gavaimi givehimeyemi?”

<sup>4</sup> Badi higayo, “Mosese kaliva gihawahegena be kilowa ana fefe gina'etoladini-yo vavinena ginaveledi be ginawavidi.”

<sup>5</sup> Yesu gigahedi gigayo, “Omi tagami kuluna fa'ina Mosese mena vehimeya vevine adi kilowa fa'ina givelemi. <sup>6</sup> Atu boi tuwai-lokalokana Yaubada babi gimidibubuna ana toveya, kaliva adi aibubuna fa'ina kahawana higa Yaubada kaliva gimidibubuna tu kwamayoku kaliva lulune gibubuna. <sup>7-8</sup> Kadu gigahe gigayo, Kwamayoku lulune gabubuna fa'ina, bana kaliva ma tamana hinana ginahegedi tu ginavemanuwa-damana be vavinena againe ginamiyave'avina ada adi'iselu hinavewowotamo'ai.

Hidedemi Yaubada gigahe fa'ina, boi tulina tulina himiyami tu adamoya hivesa'eya. <sup>9</sup> Ada au ka'i Yaubada kaliva kwamayoku give'atutamo'aidi amine o keke tamo hakwadi ginavemiyavehai-lidi.” Hidede amine Yesu Falisi bonadi gifatana.

<sup>10</sup> Muliya Yesu ana tomuliya buye manuweya himiyami tu vevine adi kilowa fa'ina kadu hito-liloveluvena. <sup>11</sup> Ada gigahedi gigayo, “Hai kaliva vavinena ginakilowedi-yo kwamayoku velugadi ginanagidi, medema ana egana to'udo fa'ina vavinena givagavekoyodi. <sup>12</sup> Kadu meda anafai-weya hai kwamayoku moganedi hinaviholiliyeni-yo mali kaliva hinanagina, medema adi egana to'udo.”

*Yesu we'owe'o gi'itanuwakabubuyedi.*

*Madiu 19:13-15 Luke 18:15-17*

<sup>13</sup> Himiyami tu we'owe'o Yesu againe hi'ali'aliyedi be ginakibwa'edi higa ginagahenuwakabubuyedi, atu ana tomuliya to'aliya

hidakeyedi. <sup>14</sup> Yesu ginogalidi-yo ginuwakoyo gigahedi gigayo, “We'owe'o keke wanahawatadi, au Iya agaikuya hina'ela fa'ina gaveyao vaita we'owe'o keke yadi wakikaiwabu amine, medema Yaubada yana itave'avina againe hinamiyami be ase'asediya ginavehivehimeya. <sup>15</sup> Gagahe velemo'ena gava kaliva Yaubada matane keke ginanuwahobu be kwamana kabi'ona amine ginanuwanuwa, medema keke Yaubada yana yo'ogaga agaidiya ginaluku-yo be yana itave'avina againe ginamiyami, keke-mo'a.” <sup>16</sup> Ada au we'owe'o sa'eyana sa'eyana gifewadi be giwahidi, nimana badi agaidiya gisena au gigahe gigayo, “Yaubada ginanuwakabubuye.”

*Kwanatubulakahina yana walokoloko Yesu gikilowena.*

*Madiu 19:16-26 Luke 18:18-27*

<sup>17</sup> Tu Yesu yanana Yelusalema againe gidalowoga ma kaliva sa'eyana Bana againe gimadu gi'ibo'ula-mo'a be gitoliyena gigayo, “Tovehawala yamumu, gavaimi ganadewa-yo yawai-vagahiku gananuhagani?”

<sup>18</sup> Ada Yesu gigahena gigayo, “Gavana fa'ina Iya uhawaveyamumuyeku? Keke tamo hakwadi yamumuna, au Yaubada anakaibe'u-mo'a yamumuna. <sup>19</sup> Yaubada yana vehimeya ahe uhalamanena higa keke unaluve'alika keke unakelele keke unakai'afu, tobohiya yana dewa fa'ina keke unagahe-kawowo, keke unave'alololo yo tobohiya yana gaitoma ginavele tu aimo keke un-

afatani. Kadu sa'eyana ma tama be hina unave'amohimohinedi.”

<sup>20</sup> Bana kaliva gigayo, “Tovehawala, mena vehimeyai-dina aimo kabi'okuya gavebutu ga'ita'itave'avina be ganunauwena tova adamoya.”

<sup>21</sup> Ada Yesu gi'itadoneni tu yana nuwanuwa bana againe ginauna ada gigahena gigayo, “Dewa sa'eyanaga againe ukali'uho. Au unana ya lokoloko moya'aina unakimonevedamanena be fatana koyokoyo agaidiya unafolakena ada au aimo laufata hagihagina lobameya unanuhagana. Unafolakeni-yo una'ela be Iya agaikuya unavetomuliya.” <sup>22</sup> Bana kaliva Yesu yana gahe ginogalini-yo gilumagibou ada yana wanuwavita gina, fa'ina yana lokoloko moya'aimo'ena.

<sup>23</sup> Au Yesu ana tomuliya gilumataviledi gigahedi gigayo, “Badi wakalivadiyao yadi luku Yaubada yana yo'ogaga agaidiya au vita-mo'ena.”

<sup>24</sup> Ana tomuliya yana gahe fa'ina hiyaulowoga. Atu Yesu gigahе-havagiledi gigayo, “Natukweyao, badi wakalivadiyao yadi luku Yaubada yana yo'ogaga agaidiya au vita-mo'ena. <sup>25</sup> Ka'i yomuyomu lakahina ana egana kameli gaima matane ginaluku, medema vitana. Atu ka'i wakalivana Yaubada yana yo'o agaidiya ginaluku be yana itave'avina againe ginamiyami, medema vita-mo'ena.”

<sup>26</sup> Tomuliya mena yana gahe hinogalini-yo hiyaulowogahega-mo'a ada higahe higayo, “Ha! Keke tamo hakwadi anafaiweya kibababala ginanuhagani.”

27 Yesu gi'itakwanekwanedi gigayo, “Kaliva keke tauidiyao adifaiweya kibababala hinanuhagani, atu medema Yaubada ana tagalowalowa. Fa'ina kaliva adi kibababala o ka'i gavadi gavadi moya'aina au Yaubada ana tagalowalowa.”

*Yesu hawahega ana laufata fa'ina gilukahihi.*

*Madiu 19:27-30 Luke 18:28-30*

28 Tu Fita givebutu Yesu gigahena gigayo, “U'ita ime gaitoma moya'aina ahengena be O againiya avetomuliya.”

29-30 Yesu gigayo, “Gagahe velemo'ena, gava kaliva yana manawa gihegena o ka'i tobohiyaneyao o nouneyao o hinana o tamana o natuneyao o yana babi Iya fa'ikuya kadu yaku Venuwa'ata Yamumuna ginalumamalena fa'ina ginuyabuyabudi, medema tova adamoya ana laufata lakahi-mo'ena gavadi gavadi hagihagina wona velemona ginavaina, manawa tobohiyaneyao nouneyao hinaneyao natuneyao ada babi ginanuhagadi. Kadu bana yaku kaliva fa'ina aulolo tulina tulina kaliva nimadiya ginanuhagana. Tova adamoya au hidede amine ginanuhagana, ada kadu tova mulina yawai-vagahina ginanuhagana.

31 Tu badi adamoya vaita wai hidanagoni-ma aimo wai hinamulina, kadu badi adamoya vaita wai hidamulini-ma aimo wai hinanagona.” Hid-edemi Yesu gigahe.



*Tova anaveto Yesu yana alika fa'ina gilukahihi.*

*Madiu 20:17-19 Luke 18:31-34*

<sup>32</sup> Tu Yesu ana tomuliya edeya ginagoyedi tu hinauna Yelusalema againe, ada badi tomuliya nuwadi givegafo'uya'uya ada mali kaliva wai himuli-mo'ena ma himatauta. Au Yesu yana yo'o tuwelo gisi'aliyedi be gavaimi Bana againe ginalakayemu-ma givenuwa'atadi. <sup>33-34</sup> Gigahedi gigayo, “Wa'ita, Yelusalema againe kananauna ada Iya Tohobu'ela badi abaveyao ana tofaisewa kikaiwabudiyao kadu Mosese yana vehimeya ana tovehawala nimadiya hinahegenauweku, be badi alikeya hinahegeku. Au yo'o tulidi keke miYuda nimadiya hinahegenauweku ada badi hinahawavelaigeku, hinakiwaliku hinamunukoyokoyoku tu hinaluve'alikaku. Atu tova anaveto againe ganamididi-havagi.” Hidedemi Yesu givenuwa'atadi.

*Yemesa Yoni hive'o'ola be Yesu buye hinakaiwabu.*

*Madiu 20:20-28*

<sup>35</sup> Tu medema tovai-nadi Yemesa Yoni Sebedi natuneyao Yesu againe hi'ela higayo, “Tovehawala, yama nuwanuwa sa'eyana analukahihiyena be udanuwakabubuyema.”

<sup>36</sup> Bana Yesu gitoliyedi gigayo, “Gavadi nuwanuwami omi fa'imiya ganagani?”

<sup>37</sup> Badi higayo, “Udahawahegema be aimo tova mulina unakaiwabu-mo'a againe ime ama'iselu buye adakaiwabu, higa i'ataginiya kadu i'imawaniya adavetoga.”

<sup>38</sup> Atu Yesu gigahedi gigayo, “Gavadi wave'o'olena-ma ana nuwanuwa keke wadahalamaneni. Aimo tagiya aulolo ana gowa ganayuyena. Iya ganayuyena amine, ka'i kadu omi ami'iselu amifaiweya wanayuyena o ka'i keke? Kadu bafitaiso amine aulolo againe hina'utuviku. Ka'i omi amifaiweya kadu mena aulolo lakahi-mo'ena wanawahina.”

<sup>39</sup> Badi Yemesa Yoni higayo, “Au ime amafaiweya.” Ada Yesu gigayo, “Wona velemona yaku tagiya yaku aulolo ana gowa Iya ganayuyena-ma kadu omi wanayuyena. Kadu aulolo againe ganabafitaiso amine, meda omi mena aulolo againe wanabafitaiso. <sup>40</sup> Atu gaveyao i'atagikuya i'imawakuya hinavetoga, medema keke yaku abavehimeya. Au gaveyao fa'idiya Yaubada mena abavetoga kikaiwabuna gikidewedewena, medema hinavaina.”

<sup>41</sup> Tu tomuliya velugadiyao teni, tobohiyadiyao Yemesa Yoni yadi ve'o'ola hinogalina againe, hivebutu hinuwakoyoyedi. <sup>42</sup> Au Yesu gikovavaga'auhidi gigahedi gigayo, “Omi wahalamanena gaveyao yo'o tulidiyao agaidiya hivewagadi tovehimeya, medema yadi wa'agodadaga yadi yo'o hi'ita'itave'avidu, kadu yadi tokikaiwabu yadi waselakalaka kaliva koyokoyodiyao higahegahedi. <sup>43</sup> Tu omi'iyao ma keke medede amine wanahuluhuluva. Au gaveyao omi agaimeya nuwanuwami wanakikaiwabu, au gilubodami be tobohiyamiyao agaidiya wanavetofaisewa. <sup>44</sup> Kadu gaveyao nuwanuwami wanavetonagona, medema tobohiyamiyao moya'aidi agaidiya wanave'agetoga. <sup>45</sup> Meda

anafaiweya Iya Tohobu'ela keke omi tomiyababi agaimiya gada'ela be omi wanavelugaku fa'ina. Au ga'ela be Iya omi ganavelugami ada yawaiku ganahawahegena be mena yaku laufata againe moya'aimi yami koyona fa'ina yogoyogonimiyao wamimiyami-ma ganayaumi.” Hidedemi Yesu gigahē.

*Yesu tomatakoyo ana egana Batimiyo gikiveya-mumuna.*

*Madiu 20:29-34 Luke 18:35-42*

<sup>46</sup> Tu Yesu ana tomuliya buye hinauna tu melala ana egana Yeliko againe hiyemu. Himiyami tu kadu hilowoga. Yo'o lakahina badi buye hilowolowoga tu tomatakoyo sa'eyana ana egana Batimiyo, bana higa Timiyo natuna, edeya gihiyoto be tonaudadana agaidiya mani give'ove'o'ola. <sup>47</sup> Ada Yesu kwanaNasaledi ginauna ma ginogalini-yo givebutu gikovakova gigayo, “Yesu, O Devida bwanenena, uda'itanuwakabubuyeku.”

<sup>48</sup> Kaliva moya'aidi hidakeyena be higa ginave'amata. Atu bana kadu agona gilakata-mo'a gikovadona gigayo, “O Devida bwanenena uda'itanuwakabubuyeku.”

<sup>49</sup> Au Yesu ginumidi gigayo, “Wayowanini be gi'ela.” Ada tomatakoyo hiyowanina higayo, “U'asevatu be umidi fa'ina Bana giyowani.” <sup>50</sup> Au ana aikeva givehalilina digo gitowamidi be Yesu againe gi'ela.

<sup>51</sup> Au Yesu gigahena gigayo, “Gavadi nuwanuwa o fa'iniya ganagani?” Ada tomatakoyo gigayo, “Tovehawala, nuwanuwaku gada'italele.”

<sup>52</sup> Au Yesu gigayo, “Unana, uvetumaganeku fa'ina uyamumu.” Ada auhe'ama matana gi'italele ada Yesu edeya gimuliyena.

## 11

*Yesu doniki kwaune Yelusalema againe giyemu.*

*Madiu 21:1-11 Luke 19:28-40 Yoni 12:12-19*

<sup>1</sup> Yesu ana tomuliya buye Yelusalema hi'iveda'ufona tu melala luhei Bedefegi kadu Bedani oya Olive againe hiyemu. Medede againe hiyemu tu ana tomuliya adi'iselu gigahedi be wai hinanagona. <sup>2</sup> Gigahedi gigayo, “Omi wai wanagona yuwa melala againe wanaluku, ada wanalukuluku tu doniki natudi ai againe hiluhifona-ma wanamadu'itana. Mena doniki kwaune keke tamo hakwadi boi gidayage. Au wanayauna be wana'aliyena. <sup>3</sup> Ada ka'i tamo hakwadi ginagahe ginagayo, Gavana fa'ina wayauyauni? au wanagahena wanagayo, Yama Kaiwabu nuwanuwana me'ama ada aimo tova kabi'ona ginaveleyewemi.

<sup>4</sup> Au tomuliya adi'iselu hina doniki natudi manawa eda'awaneya gava melaleya hiluhifona-ma hinuhagana, ada au hiyauna. <sup>5</sup> Ada badi tolauboda medede againe himidimidi-ma higahedi higayo, Gavadi wagagauga? Gavana fa'ina doniki natudi wayauyauni?” <sup>6</sup> Ada Yesu gigahe amine higahedi, ada au hihawahegedi be hina. <sup>7</sup> Au doniki natudi Yesu againe hi'aliyena, adi aikeva kwaune

hiyavelina be Bana giyage. <sup>8</sup> Ada kaliva moya'aidi yo'o agaidiya adi aikeva edeya hiyaveyavelina, kadu tufoidi ai laganina walukulukumina faheya hikuyana-ma edeya hiyaveyavelina. <sup>9-10</sup> Ada kaliva tufoidi wai hinagona tufoidi wai himulina, ada Yesu buye hinauna tu hikovakova higayo, “Hosana, O adavadava.

Kaiwabu ana eganeya u'ela'ela-ma au Yaubada ginanuwakabubuye.

Tuwai-mo'ena bwaneneda Devida yo'o moya'aidi givhimeyedi amine,

O'eni Devida bwanenena unavehimeyema.

Yaubada ya abavehimeya ginanuwakabubuyena, kadu tomiyalobama o hinadavadava yadi hosana hinayakahina.”

<sup>11</sup> Ada Yesu Yelusalema againe gilakayemu gina manuwa-tafalolo lakahina againe giluku ada gaitoma moya'aina gilumatavilena. Kadu gihobu ada mala ahe gilavina fa'ina yana yo'o tuwelo buye Bedani againe hina.

*Yesu ai ana egana fiki gi'alatabutabuyena.*

*Madiu 21:18-19*

<sup>12</sup> Bogi hida mala gilauna Bedani againe hitauya Yelusalema againe hinauna tu Yesu mafu gilauna.

<sup>13</sup> Yuwa lauveya ai ana egana fiki walukulukumina gi'ita-yo gina be ka'i tamo guwana gisenama gina'itana. Gida'ita ma lukuminaga gidauda, fa'ina medema keke fiki yana tova yoyo. <sup>14</sup> Au ai againe gigahe gigayo, “Aimo tova mulina kadu

keke unayoyo be kaliva guwa gina'ani, keke-mo'a.” Hidedemi Yesu ai gi'alatabutabuyena tu tomuliya hinogalina.

*Yesu manuwa-tafalolo lakahina againe giluku.*

*Madiu 21:12-17 Luke 19:45-48 Yoni 2:13-17*

<sup>15</sup> Hinauna tu Yelusalema againe hilakayemu, au Yesu manuwa-tafalolo lakahina ana eda'awaneya giluku givebutu badi mene manuwa-tafalolo againe hilukimokimone-ma giwavidi, mani tulina tulina ana tosenisi yadi tolama givetala'afufuna kadu kaliva bunebune abaveyao fa'ina hikimonevedamane-ma yadi abavetoga gituwabwatavilana. <sup>16</sup> Ada kaliva moya'aidi gihawatadi be keke tamo lokoloko kimone fa'ina manuwa-tafalolo ana eda'awaneya hinaselukuweni.

<sup>17</sup> Au givebutu yo'o givehawaledi gigayo, “Yaubada bonana eto'etoladina gavaimi gigahe ma ma'i wahalamanena o ka'i keke? Gigayo, Yaku manuwa hinavewagana abave'ove'o'ola ana manuwa yo'o tulina tulina fa'idiya. Tu omi'iyao ma vaita tokai'afu yadi abaga amine wafaisewana.” Hidede amine Yesu gidakeyedi.

<sup>18</sup> Tu badi abaveyao ana tofaisewa kikaiwabudiyao kadu Mosese yana vehimeya ana tovehawala Yesu yana dakeya hinogalina, au himatausena fa'ina hivebutu eda hilelena be higa hinaluve'alikana. Kaliva moya'aidi Yesu yana vehawala nuwadi gi'abina be hiyaulowoga fa'ina, mena kaliva kikaiwabudiyao Yesu himatausena.

<sup>19</sup> Ada au mala gisilavina Yesu ana tomuliya buye hilowoga be Yelusalema hihegena.

*Yesu vetumagana be ve'o'ola fa'ina givehawala.  
Madiu 21:20-22*

<sup>20</sup> Bogi hida mala gilauna kadu hitauya ada edeya hinauna tu ai ana egana fiki hi'itana, ai lukumina matatabuna gi'awa'ulona tu walamina giwelolona. <sup>21</sup> Fita nuwana gi'afolena ada Yesu againe gigahe gigayo, “Tovehawala u'ita. Fiki u'alatabutabuyena-ma a gi'awa'ulona.”

<sup>22</sup> Yesu gigahedi gigayo, “Yami vetumagana Yaubada againe wanasena. <sup>23</sup> Gagahe velemono'ena hai kaliva ginavetumaganadona, medema hida oya againe anafaiweya ginagahe ginagayo, Una lehageya utowa. Ka'i ase'asena keke gina'amalakibo tu ginavetumagana vaita gavaimi gigahe amine ginalakayemu velemono'ena, au givetumagana amine ginanuhagana. <sup>24</sup> Yami vetumagana amine wanaruhagana fa'ina kadu ganagahe. Gavadi gavadi fa'ina wave'o'ola, wanavetumagana be higa vaita medema ahe wavaina, ada au gavadi fa'ina wave'o'ola-ma wanaruhagana. <sup>25</sup> Wave'o'ola tova, ka'i tamo hakwadi omi agaimiya gikoyo, au yana koyona wanavenuwauluyena be higa Tamami lobameya gimimiyami-ma kadu yami koyona ginavenuwauluyena. [ <sup>26</sup> Atu ka'i omi tobohiyamiyao yadi koyona keke wanavenuwauluyeni, kadu keke Tamami

lobameya gimimiyami-ma yami koyona ginavenuwauluyeni.] ”

*Yesu yana abavehimeya inubana fa'ina hitoliloveluvena.*

*Madiu 21:23-27 Luke 20:1-8*

<sup>27</sup> Tu Yesu ana tomuliya buye Yelusalema againe kadu hilakayemu. Ada Yesu manuwatafalolo lakahina ana eda'awaneya ginunudadana tu abaveyao ana tofaisewa kikaiwabudiyao kadu Mosese yana vehimeya ana tovehawala kadu kaliva lakahidiyao Bana againe hi'ela. <sup>28</sup> Ada hitoliloveluvena higayo, “O ugahema, ha'againa ya abavehimeya uvaini-yo mena gaitoma tulina tulina boiyesedi hidei manuwatafalolo lakahina againe ufifaisewadi? Hakwa'adi mena abavehimeya givele-yo hidedemi uhuluva?”

<sup>29</sup> Yesu gigayo, “Yaku tolilualuva sa'eyana omi agaimiya ganasena. Ka'i bonaku wanafatana amine o yaku abavehimeya inubana fa'ina ganavenuwa'atami. <sup>30</sup> Hakwa'adi abavehimeya Yoni Tobafitaiso givele-yo kaliva gikivebafitaisoyedi? Ka'i yana abavehimeya Yaubada againe give'inuba o ka'i kaliva agaidiya? Bonaku wafata.”

<sup>31</sup> Yesu gigahe-yo badi hivebutu buye hivek-wageya higayo, “Ka'i kanagahe vaita Yoni yana abavehimeya Yaubada againe gidave'inuba au Bana ginagahe ginagayo, Ka'i Yaubada againe digo, gavadi-yo Yoni yana gahe keke wadave-tumaganeni? <sup>32</sup> Tu ka'i kanagahe vaita kaliva



agaidiya gidave'inuba..." A! Mema yo'o hi-matausedi higa vaita gavaimi hinakivekoyodi, fa'ina moya'aidi hinuwanuwa vaita Yoni Yaubada bonana ana to'awatalatalaina.

<sup>33</sup> Hidedemi tonagona hinuwanuwa fa'ina Yesu yana tolilualuva hidede amine hifatana higayo, "Ka'iwa. Ime keke adahalamaneni."

Ada Yesu gigayo, "Omi keke wadagaheku fa'ina, meda anafaiweya Iya keke ganavenuwa'atami hade'againa yaku abavehimeya give'inuba-yo hida gaitoma gafifaisewani." Hidede amine Yesu miYuda adi tonagona agaidiya gigahe.

## 12

*Faha ana to'itave'avina koyodiyao adi gahetalahobuhobu.*

*Madiu 21:33-46 Luke 20:9-19*

<sup>1</sup> Tu Yesu givebutu badi miYuda adi tonagona agaidiya gahetalahobuhobu amine gilukahihiyedi. Gigayo, "Kaliva sa'eyana ai guwana ana egana kelefi yana babi againe gifahana. Faha gi'alana, kahu giyalana be aimo guwana ana abavagafuwafuwa fa'ina, kadu kweda tunugina faha ana itave'avina fa'ina giyogona. Kelefi ana faha gikidewedewena gihavaina, kaliva tufoidi faha ana to'itave'avina gisedi tu yana melala gihegena gina mali fafaliya ginunudadana. <sup>2</sup> Himiyami tu kelefi ana aikolu ana tova giyemu againe, tonifaha ana agetoga faha ana to'itave'avina agaidiya gi'iveninisena be yana faha againe ana guwa ginavaina. <sup>3</sup> Badi to'itave'avina ana agetogai-nadi hikive'avina digo

himunukoyokoyona be makagekagena hiwavina.  
 4 Au kadu agetoga velugana gi'iveninisena tu to'itave'avina agetoga u'une hilaulauna ada hikivekoyo-mo'ena. 5 Kadu agetoga sa'eyana gi'iveninisena tu to'itave'avina hiluve'alikana. Meda anafaiweya agetoga kadu moya'aidi hikivekoyodi. Tufoidi himunukoyokoyodi, tufoidi hiluve'alikadi.

6 Tu kaliva sa'eya-mo'ena gimiyami, higa tonifaha natuna natu'ase'asena. Muliya-mo'ane bana'e badi to'itave'avina agaidiya gi'iveninisena ada gigahe gigayo, Natuku be hinave'amohimohinena.

7 Giyemu-yo wama to'itave'avina taudiyao hive'agahegaha higayo, Hida hima bana ana hilafa. Wa'ela be kanaluve'alikana ada yana babi taudeyao kanavaina. 8 Au hikive'avina digo hiluve'alikana be ala kwaune hihegevihilena.

9 Tonifaha gavaimi ginaga? Au ginayewa'ela be badi to'itave'avina ginaluve'alikadi ada yana faha to'itave'avina velugadiyao nimadiya ginasena.

10 Tu gahe sa'eyana Veyao Tuwaina ana bukiya ma'i wahawahawa o ka'i keke? Gigayo, Ogola manawa ana to'aiyogona hikilowena-ma au holili'abi manawa hinafane-mo'ane gimidimidi.

11 Kaiwabu yana vehimeya againe au hidemi gilakayemu, ada medema giluboda-mo'ena ide matadeya." Hidedemi Yesu Yaubada yana gahe Natuna ana kilowa fa'ina giyakahina.

12 Au miYuda adi tonagona Yesu badi fa'idiya mena gahetalahobuhobu gilukahihiyena ma

hi'ayaunena fa'ina, hivebutu eda hilelelena be higa hinakive'avina. Atu yo'o himatausedi fa'ina hinuyabuyabuna be hina.

*Yesu takesi ana sewadi fa'ina hitoliluvelevuena.*

*Madiu 22:15-22 Luke 20:20-26*

<sup>13</sup> Muliya miYuda adi tonagona yadi kalivamomo higa Falisi tufoidi kadu Helodi yana yo'o kalivadi tufoidi hi'iveninisedi be yadi tolilualuva againe hinavebauna be higa tamo gavadi koyona ginagaheyena. <sup>14</sup> Hiyemu-yo higahena higayo, “Tovehawala, ime ahalamanena O ya gahe velemono'ena, keke udave'alololo. Ada kaliva ya vehawala fa'ina gavaimi hinagahe ma keke udamatauseni. Kadu kaliva yadi kikaiwabu keke udanuwenuwani, au ugahe-mo'edi be Yaubada yana eda fa'ina uvehavehawala velemono'ena. Au anatoliye, kwanaLoma yada tokaiwabu lakahina Sisa againe takesi kanasena, ka'i medema gilubodana o ka'i keke? Ka'i mena takesi kadasena o ka'i keke?”

<sup>15</sup> Hidedemi hitolilualuva tu Yesu yadi ve'alololo ase'asediya gi'ita-yo gigayo, “Gavadi-yo wanuwanuwa vaita wanavebauku? Mani kabala wa'aliye be gana'itana.”

<sup>16</sup> Au kabala hi'aliyena. Bana gitoliyedi gigayo, “Hida hakwadi magigina? Kadu hakwadi ana egana mene kabala againe hikilumini?” Badi higayo, “Bana Sisa.”

<sup>17</sup> Au Yesu gigahedi gigayo, “Hadema Sisa yana lokoloko, medema Sisa againe wanasena. Kadu hadema Yaubada yana lokoloko, medema

Yaubada againe wanasena.” Ada au yana bonalaufata giveyaulowogidi.

*To'alika yadi mididi-havagi fa'ina Yesu hitoliyena.*

*Madiu 22:23-33 Luke 20:27-40*

<sup>18</sup> Tu tonagona tafatafalolodiyao adi egana Sadusi tufoidi Yesu againe hi'ela be hinatoliluveluvena. Badi'iyao ma higahe vaita aimo tova mulina to'alika keke hinamididi-havagi. <sup>19</sup> Badi higayo, “Tovehawala, Mosese yana buki-vehimeya againe hidede amine gi'etoladi. Ka'i kaliva sa'eyana kwamayoku ginagina ada natudi keke tu gina'alika, au kaliva tobohiyana yana vayasi anafaiweya gidanagina be tobohiyana ana hilafa fa'ina natuneyao gina'ivetubugidi. Au hidede amine Mosese givehimeya. <sup>20</sup> Au kaliva tobohiyaneyao adi yo'o seveni himiyami tu tomo'ainagona kwamayoku ginagina ada natudi keke tu gi'alika. <sup>21-22</sup> Ada taina yana vayasi ginagina ada natudi keke tu gi'alika. Meda anafaiweya kaliva anaveto ginagina ada natudi keke tu gi'alika, ada hinunauwena hinunauwena tu taina kaliva anaveseveni natuna keke tu gi'alika. Muliya-mo'ane kwamayoku gi'alika. <sup>23</sup> Au aimo tova mulina kaliva hinamididi-havagi ana toveya bana kwamayoku-nadi ma gava kaliva vavinena? Fa'ina kaliva adiveseveni kwamayoku sa'eyana hinagina.”

<sup>24</sup> Tu Yesu gigayo, “Yaubada bonana ana vehawala kadu Yaubada yana faiwala ma'i

wanuwenuwena o ka'i keke? Keke wadaha-lamaneni fa'ina, omi keke wadanuwenuwa tunutunugina. <sup>25</sup> Tova mulina to'alika hinamididi-havagi ana toveya, lobama ana tovenuwa'ata himimiyami amine meda kaliva hinamiyami. Kaliva vevine keke hinanaginagi keke hinavenavenagi. <sup>26</sup> Tu to'alika yadi mididi-havagi fa'ina ganagahe. Yaubada yana gahe sa'eyana Mosese yana buki againe ma'i wahawahawana o ka'i keke? Ai giyabelina tu keke gida'alahini-ma kahihina againe Yaubada Mosese gigahena gigayo, Iya Abelahamo yana Yaubada gamimiyami, kadu Aisake yana Yaubada gamimiyami, kadu Yakobu yana Yaubada gamimiyami. Hidedemi Yaubada gigagehe. <sup>27</sup> Badi kaliva wavewagadi ali'alikadiyao ma Yaubada yawayawadiyao gi'ita'itadi. Au Bana'e kaliva alu'aluwadi yawayawana yadi Yaubada, keke ali'alikadiyao yadi Yaubada. Gavadi-yo wagahe vaita kaliva alu'aluwadi wowodi buye gida'alika? Keke wadanuwenuwa tunutunugina, keke-mo'a." Hidemi Yesu Sadusi gigahedi.

*Hadema vehimeya lakahi-mo'ena?*

*Madiu 22:34-40 Luke 10:25-28*

<sup>28</sup> Tu badi Sadusi Yesu buye hivekwavekwageya tu Mosese yana vehimeya ana tovehawala sa'eyana givanevanenega. Yesu Sadusi bonadi gifatana hagihagina ma ginogalini-yo kadu bana gitoliloveluvena gigayo, "Ada vehimeya moya'aina Yaubada gisena-ma hadema vehimeya lakahi-mo'ena?"

<sup>29</sup> Yesu gigayo, “Vehimeya lakahi-mo'ena hidede amine. MiIsileli kanogali. Yaubada yada Kaiwabu au Kaiwabu anakaibe'u-mo'a. <sup>30</sup> Ase'ase matatabuna kadu alu'aluwa matatabuna kadu nuwa matatabuna kadu ya faiwala matatabuna Yaubada ya Kaiwabu againe unahawahege-owona be Bana againe unanuwanuwa lakahina. <sup>31</sup> Kadu vehimeya anavelu ma hidede amine. Tauni unuwakabubuye amine, tobohiyamomo unanuwakabubuyedi. Au mena vehimeyai-dina luhei vehimeya lakahi-mo'edi. Kadu keke tamo vehimeya gidakaiwabuhegedi.”

<sup>32</sup> Bana Mosese yana vehimeya ana tovehawala Yesu againe gigahe gigayo, “Tovehawala, ugahe yamumuna. Wona velemona Yaubada anakaibe'u-mo'a kadu keke tamo Yaubada velugana O ugahe amine. <sup>33</sup> Ka'i ase'aseda matatabuna, kadu nuwada matatabuna kadu yada faiwala matatabuna Yaubada againe kanase-owona be Bana fa'ine kananuwanuwa lakahina, kadu taudeyao kananuwakabubuyeda amine tobohiyadeyao kananuwakabubuyedi, au medema giluboda-mo'ena. Ka'i kevakeva abaveyao fa'ina kanakabukabuna o yada yomuyomu yada faha Yaubada againe kanahawahegena, medema gilubodana. Atu ka'i mena vehimeyai-dina luhei kayakahina-ma kana'ita'itave'avina medema giluboda-mo'ena.”

<sup>34</sup> Ada Yesu mena tovehawala yana bonalaufata au nuwahuyahuyana ma ginogalina againe, gigahena gigayo, “Vaita tova kabi'ona Yaubada againe unahawahege be yana yo'ogaga agaidiya unaluku-yo Bana'e ase'aseniya

ginavehivehimeya.” Hidedemi Yesu tovehawala bonana gifatana yamumuna yo kaliva velugadiyao himatauta be tolilualuva kadu keke velugana Bana againe hidaseni.

*Keliso inubana fa'ina.*

*Madiu 22:41-46 Luke 20:41-44*

<sup>35</sup> Muliya Yesu manuwatafalolo lakahina againe givehavehawala tu gigahe gigayo, “Gavadi-yo Mosese yana vehimeya ana tovehawala higahe vaita Yaubada yana Tovegida ana egana Keliso Devida bwanenena? <sup>36</sup> Fa'ina tuwai-mo'ena Alu'aluwa Mahalina Devida gikivetuvetununi-yo bana tauna gigahe gigayo, Bana Yaubada Kaiwabu iya yaku Kaiwabu giga-hena gigayo,

Nima i'atagikuya unahiyoto, O unamiyami tu nibaimomo ageyafayafaniya ganasedi.

<sup>37</sup> Au hidede amine Devida tauna Keliso givewagana yaku Kaiwabu, tu gavaiya'amine yana Kaiwabu kadu bana bwanenena muliya gitubuga amanadi?” Hidede amine Yesu givehawala ada kaliva hiyo'oyo'o-ma yadi wavemwamwala bonana hinogalina.

*Yesu Mosese yana vehimeya ana tovehawala*

*gihawavekoyoyedi.*

*Madiu 23:1-12 Luke 11:43, 20:45-47*

<sup>38</sup> Tu Yesu yana vehawala againe kadu gigahe gigayo, “Taumiyao wana'itave'avimi be Mosese yana vehimeya ana tovehawala yadi dewa keke

nuwami gina'abini. Nuwanuwadi aikeva tunugina hina'oseni-yo abakimokimone againe hinanunudadana be kaliva hinalusiuleyedi kadu hinagayo, Velemodi. <sup>39</sup> Nuwanuwadi manuwa-abavehawala ana egana sinagogi agaidiya kadu avemwamwala againe abavetoga kikaiwabuna againe hinavetoga. <sup>40</sup> Ada sikwasikwadiyao yadi lokoloko hilemadi, ada hive'ove'o'ola-fa'ila be higa kaliva hinahawaveyamumuyedi. Yadi koyona ve'o'ola-fa'ila againe hikevana fa'ina adi vita gavatubuga hinanuhagana.” Hidedemi Yesu tovehawala tovehawalai-dina yadi dewa fa'ina givenuwa'ata.

*Sikwa sa'eyadi yadi velekawowo fa'ina.*

*Luke 21:1-4*

<sup>41</sup> Ada Yesu manuwa-tafalolo lakahina againe givetoga ada velekawowo ana abavedodoga gihagana. Yo'o yadi velekawowo hidododona-ma gilubodedi. Wakalivadiyao moya'aidi hi'ela mani lakahina hidodona. <sup>42</sup> Tu sikwa koyokoyodi hi'ela kabala kukwauhina luhei hidodona, fatana vaita toea sa'eyana amine.

<sup>43</sup> Au Yesu ana tomuliya gikovavaga'auhidi be gigahedi gigayo, “Gagahe velemo'ena mena kaliva moya'aidi yadi velekawowo mani lakahina hidodona tu hida sikwa koyokoyodi yadi velekawowo kabi'ona againe hitubuhegedi. <sup>44</sup> Fa'ina badi wakalivadiyao yadi mani tufonaga hidodona ada yadi tufo lakahina aimo gidadauda, tu badi sikwa koyokoyodi yadi mani matatabuna hidodowona, au gavadi againe adiga o adi kaleko hi-



dakimonena mani-nadi Yaubada againe hihege-  
'owona.”

## 13

*Yesu manuwa-tafalolo ana lauyawela fa'ina  
gilukahihi.*

*Madiu 24:1-2 Luke 21:5-6*

<sup>1</sup> Yesu manuwa-tafalolo lakahine gihobuhobu  
tu ana tomuliya sa'eyana manuwa giyofena gi-  
gayo, “Tovehawala u'ita. Manuwa ana kabala ga-  
vatubuga! Aiyoi, hima ana aiyogona tulina tulina  
manuwa vewaga!”

<sup>2</sup> Yesu gigahena gigayo, “Ika, wadema manuwa  
adi ita vewaga fa'ina ganagahe. Kabala againe  
hikivetalana tu aimo keke tamo kabala kabal-  
ahiyana tabone ginada, au moya'aina hinatu-  
tuyauyaulena.”

*Tova mulina aulolo tagiya lakahina babiya gi-  
nalakayemu.*

*Madiu 24:3-22 Luke 21:7-19*

<sup>3</sup> Tu Yesu gina oya Olive againe gilaka  
givetoga ada manuwa-tafalolo lakahina  
gihagana. Au badi Fita Yemesa Yoni Anidulu  
adikaibe'uyanina Bana againe hi'ela hitoliyena  
higayo, <sup>4</sup> “Unavenuwa'atama, gava tova manuwa-  
tafalolo ana lauyawela ulukahihiyena-ma  
ginalakayemu? Mena gaitomai-dina gavadi  
gavadi hinalakayemu ma gava aituha ana'ita-  
yo anahalamane-hagihagiyeni?”

<sup>5</sup> Au Yesu givebutu aituha fa'ina givenuwa'atadi  
gigayo, “Taumiyaio wana'itave'avimi be

keke tamo hakwadi yana fwaya againe ginanuwa'abiyemi. <sup>6</sup> Fa'ina aimo tufoidi moya'aidi hina'ela aku egana hinayakahina hinagayo, Kaliva Yaubada givegidena-ma iya kaliva-mo'eku. Hidedemi hinagahe be kaliva moya'aidi yadi fwaya againe hinanuwa'abiyedi. <sup>7</sup> Kadu aituha sa'eyana ma gaviya moya'aina ginalakayemu ada kaliva yadi ve'amunumunuga butudi wananogalina, kadu hai lauveya hinalulugaviya medema valeyadi wananogalina. Hidedemi wananogalina amine keke ase'asemi gina'akolukoluni. Mena gaitomai-dina anafaiweya hidalakayemu tu tova ana lauyabu au aimo muliya-mo'ane ginalakayemu. <sup>8</sup> Yo'o sa'eyana mali yo'o buye hinave'amunumunuga, kadu fafali sa'eyana mali fafali buye hinalulugaviya. Li'uli'u lakahina fafali tulina tulina agaidiya hinalakayemu, kadu meda anafaiweya loka moya'aina. Venatuna ana tova ginaluveda'ufo againe kwamayoku hinavefahediyo yadi aulolo ginavebutu amine, meda anafaiweya mena gaitomai-dina galukahihiyedi-ma hinalakayemu againe aulolo tagiya lakahina ginavebutu.

<sup>9</sup> Atu taumiyo wana'itave'avimi fa'ina aimo kaliva hinakive'avimi be kotu againe hinahegenauwemi, kadu yadi manuwa-abavehawala ana egana sinagogi agaidiya hinavekotumi be bulava againe hinalaulaumi. Ada hinahegenauwemi be kabemani kadu kini matadiya wanamidi ada omi aku tomuliya fa'ina hinavedewayaugimi. E, badi matadiya wanamidi

be Iya fa'ikuya wana'awatalatalaina. <sup>10</sup> Ada yaku kaliva Yaubada yana Venuwa'ata Yamumuna yo'o tulidi tulidi agaidiya hinalumamalena be babi matatabuna hinaluyabuna. Hidedemi yo'o moya'aidi hinavenuwa'atadi tu muliya tova ana lauyabu ginalakayemu. <sup>11</sup> Tu hinakive'avimi be hinavekotumi ana toveya, keke yami wamatauta wanavenuwanauna-vagata vaita ka'i gavaimi wanagahe. Au medema tovai-nadi gavaimi Yaubada gina'alavelevelemi, medema wanagaheyena. Fa'ina hifufu wanagaheyena-ma keke taumiyao yami nuwanuwa againe ginalakayemu, au Alu'aluwa Mahalina awamiya ginalukahihi.

<sup>12</sup> Ada kaliva sa'eyana tauna tobohiyana kaliva nimadiya ginahawavemogatalena be hinaluve'alikana fa'ina, kadu anafaiweya kwamana tamana natuna ginahawavemogatalena be hinaluve'alikana. Ada we'owe'o badi tamadiyao agaidiya hinavenibaina be tamadiyao hinadiyao alika hinanuhagana fa'ina. <sup>13</sup> Ada omi aku tomuliya fa'ina kaliva moya'aidi omi agaimiya hinanuwanuwakoyo, tu gaveyao wana'atuvefa'ila be Yaubada againe wanamiyamiyave'avina tu alika ana maka, medema ginakibababalemi.

<sup>14</sup> Tu aimo abakivekoyo koyo-mo'ena abaga hawahawatana againe hinakivemididina-ma wana'itana againe omi Yudiya ana fafali againe wanamiyami-ma au oyeya wana'ota. (E, omi tohawa wana'itanuwenuwena.) <sup>15</sup> Hai kaliva yana tolameya ginamiyami, medema keke yana manuweya ginaluku be higa yana

lokoloko ginavaini. Au ginamadu'ota. <sup>16</sup> Hai kaliva yana faheya ginamiyami, medema keke melaleya ginayewani be higa ana lifi ginavaini. Au ginamadu'ota. <sup>17</sup> Hoiyoi vevine wahifugadiyao kadu vevine aimo hivehuvuhuhu amanadi! Mena ota ana toveya vita lakahina hinanuhagana. <sup>18</sup> Yaubada againe wanave'o'ola be higa mena gaitoma koyona keke wehi ana toveya ginalakayemu. Ka'i wehi digo gavaimi be oyeya wada'ota? <sup>19</sup> Fa'ina medema aiyetai-dina agaidiya vita lakahi-mo'ena ginalakayemu. Mena vitai-nadi ma boi tuwai-lokalokana Yaubada babi gimidibubuna ana toveya kadu tova hinafane keke hidanuhagani. Kadu aimo tova mulina keke hidede amine hinanuhagani. <sup>20</sup> Tu Kaiwabu mena tova vita-mo'ena galukahihiyena-ma ana aiyeta yana nuwanuwa againe ahe gidabana be ginakali'uho. Ka'i keke gidadabani digo, kaliva moya'aidi hidabwavi. Atu Tauna yana kaliva giluwafadi be yana yo'ogaga agaidiya hiluku-ma adi lugolagola fa'ina mena tovai-nadi hinafane ginadabana be ginakali'uho.

*Yesu keliso-fwayafwaya fa'idiya givenuwa'ata.*

*Madiu 24:23-28 Luke 17:23-24*

<sup>21</sup> Tu ka'i tamo hakwadi ginagahemi ginagayo, Wa'ela hida kalivai-nadi givekeliso-ma wana'itana, o ka'i ginagayo, Wanana yuwa kaliva givekeliso-ma wana'itana. Ka'i hidede amine ginagahe o keke bonana wanavetumaganeni. <sup>22</sup> Au tova mulina tove'alololo hinalakayemu be

hinagahe vaita hidavekeliso o ka'i hidavefalofita higa Yaubada bonana ana to'awatalatalaina. Aituha fifiwaladi ada abaveyaulowoga badi hinafaisewadi be hinagalualuva ka'i yadi fwaya againe Yaubada yana kaliva hinanuwa'abiyedi. E, kaliva vevine Yaubada giluwafadi be yana yo'ogaga agaidiya hiluku-ma hinagalualuvadi vaita hinanuwa'abiyedi. <sup>23</sup> Au taumiyao wana'itave'avimi. Tove'alololo yadi dewa fa'ina gavenuwa'ata-vagahimi.” Hidedemi Yesu gigahe.

*Tohobu'ela yana yemuna-havagi fa'ina.*

*Madiu 24:29-35 Luke 21:25-33*

<sup>24</sup> Tu Yesu kadu gigayo, “Mena vita lakahi-mo'ena ana tova ginahavaini-yo kauwana gina'uyuyu kadu vaikohi ana mahalina ginakwe'u. <sup>25</sup> Ibadibadi lobameya gina'akolukoludi be hinabe'u, ada lobama ana gaitoma fifiwaladiyao adi iviya gina'atuliyeliyedi.

<sup>26</sup> Hidedemi lobama ana loi hinahuluva tu Iya Tohobu'ela buhibuhi againe gayewayewa'ela-ma hina'itaku. Yaku wafaiwala lakahina kadu yaku wamahalina ve'akinamanamalina gayewayewa'ela-ma hina'itaku. <sup>27</sup> Au yaku tovenuwa'ata gana'iveninisedi be kaliva vevine Yaubada giluwafadi-yo yana yo'ogaga agaidiya hiluku-ma hinavaga'auhidi. Fafali tulina tulina wabolimaneya wayavalaseya walaube'uya wa'oyeya, ka'i hai yuwa babi analauyabu o wese lobameya hinamiyami-ma hinavaga'auhidi be Iya Tohobu'ela agaikuya hinavega'auledi.

<sup>28</sup> Wa'ita, lalava ana dewa wananuwenuwena be enohega wanavaina. Lalava ginatafa ma ka'ita-yo kagayo, Kauwana yana tova gilurvedav-eda'ufo. <sup>29</sup> Meda anafaiweya mena aituhai-dina hinalakayemu ma wana'itana againe, au wanahalamanena yaku yewa'ela gilurveda'ufo-mo'a. <sup>30</sup> Gagahe velemono'ena hida tova ana yo'o keke moya'aidi hina'alika-'owoga tu nagona mena gaitomai-dina moya'aina hinalakayemu. <sup>31</sup> Lobama be babi ginayawowola tu bonaku keke ginayawowola, au ginaduva-vagata.

*Yesu yana yewa'ela ana tova keke tamo hakwadi gidahalamaneni.*

*Madiu 24:36-44 Luke 21:34-38*

<sup>32</sup> Tu yaku tova ka'i gava aiyeta o gava bai ganayewa'ela-ma keke tamo hakwadi gidahalamaneni. Badi tovenuwa'ata lobameya keke hidahalamaneni, kadu Iya Yaubada Natuna keke gadahalamaneni. Au Kamaku anakaibe gihalamanena. <sup>33</sup> Yaku yewa'ela tova keke wadahalamaneni fa'ina, ase'ase mi wanakidewedewena be wanalulauboda. <sup>34</sup> Yaku yewa'ela ana dewa ganalukahihiyena. Vaita kaliva lakahina mali fafaliya ginana amine Iya'eku. Ana agetoga givehimeyedi be yana manuwu kadu yana faha hina'itave'avina. Kaliva sa'eyana sa'eyana yadi faisewa giveledi, ada eda'awana ana to'itave'avina againe gigahe gigayo, Keke unadauda au unalulauboda.

<sup>35-36</sup> Meda anafaiweya omi wanalulauboda fa'ina Iya tonimanuwu amine yaku yewa'ela

ana kauwana keke wadahalamaneni. Ka'i mala ginabogi o bogi nafone o kamukamu ginakwage o mala ginalauna, kauwana gavaiya'amine be Iya gana'ela. Hidema fa'ina wanalulauboda be keke ganavefuta'ami-yo omi wadadauda ma gananuhagami. <sup>37</sup> Ada gavaimi omi agaimiya gagahe amine, meda kaliva moya'aidi agaidiya gagahe be wanalulauboda.” Hidedemi Yesu ana tomuliya givenuwa'atadi.

## 14

*MiYuda adi tonagona hivevai be Yesu hinaluve'alikana.*

*Madiu 26:1-5 Luke 22:1-2 Yoni 11:45-54*

<sup>1</sup> Tu aiyeta luhei hinahegedi tu tafalolo ana egana lobama ana tovenuwa'ata yana Abamaduviviya ginayemu. Medema tafalolonadi ana toveya beledi keke wa'isina hi'au'ana. Ada abaveyao ana tofaisewa kikaiwabudiyao kadu Mosese yana vehimeya ana tovehawala eda hilelelena be Yesu hinakive'avikauyeni-yo hinaluve'alikana. <sup>2</sup> Ana kive'avina

fa'ina hinuwanuwa higayo, “Ka'i yo'o hinave'atalalakalaka fa'ina, keke tafalolo lakahina ana toveya kanakive'avini.”

*Kwamayoku sa'eyana Yesu Bedani againe gibunamina.*

*Madiu 26:6-13 Yoni 12:1-8*

<sup>3</sup> Tu Yesu Bedani melaleya gina Saimoni againe giwakawaka. Bana boi givedawodawowo fa'ina hivewagana tovedawodawowo. Au Yesu

Saimoni yana manuweya gi'enolukekela gi'au'a tu kwamayoku sa'eyana gi'ela, bunama yamumu-mo'ena ana egana nado gi'aliyena fatana lakahina. Mena bunamai-nadi aba'aihiwaga kugakugana againe gidauda, kuga ana egana alabasita. Ada kwamayoku aba'aihiwaga gikidobona digo Yesu u'una gibunamina.

<sup>4</sup> Atu kaliva tufoidi hi'ita-yo hinuwakoyo hi-gayo, “Gavadi-yo hida bunama hidede amine gihiwa-kawowoni? <sup>5</sup> Ka'i hida bunama gidaki-monevedamanena o mani lakahina vaita kaliva sa'eyana yana faisewa malamala sa'eyana fatana amine gidavaina be koyokoyo gidaveledi.” Au kwamayoku higolahegehegena.

<sup>6</sup> Tu Yesu gigayo, “Au gimiya. Gavadi-yo hida kwamayoku wa'ivewowomumuni? Ginuwakabubuyeku fa'ina yana gugai kanahawaveyamumuyena. <sup>7</sup> Tova moya'aina koyokoyo hinafamiya himimiyami ada gava tova nuwanuwami wananuwakabubuyedi, au amifaiweya wananuwakabubuyedi. Tu Iya'eku ma aimo keke buye kanamiyami tova moya'aina. <sup>8</sup> Bana'e ma gavadi anafaiweya, medema gigugaiyena. Hida bunamai-nadi wowoku againe gihiwa-vagahina be aku aihuya fa'ina gikidewedeweku. <sup>9</sup> Gagahe vele-mo'ena fafali ha'amine ha'amine kibababala ana Venuwa'ata Yamumuna hinalulumamalena, meda yana huluva yamumuna Iya agaikuya ma hinalukahihiyena be ana abanuwa'udu'udu fa'ina.”



*Yudasi Yesu nibaineyao agaidiya ginahawave-mogatalena.*

*Madiu 26:14-16 Luke 22:3-6 Yoni 11:45-54*

<sup>10</sup> Yesu gigahe-yo Yudasi-Isikaliyota yo'o tuwelo kalivana gina abaveyao ana tofaisewa kikai-wabudiyao agaidiya be higa badi nimadiya ginahawavemogatalena. <sup>11</sup> Badi yana nuwanuwa hinogalina againe hivemwamwala, ada higahena vaita mani hinavelena. Au Yudasi givebutu tova hagihagina gilelena be Yesu nibaineyao agaidiya ginahawavemogatalena.

*Yesu ana tomuliya buye Abamaduviviya a'ana hi'ana.*

*Madiu 26:17-25 Luke 22:7-13*

<sup>12</sup> Tu tafalolo ana egana Beledi keke Wa'isina ana aiyeta nagona giyemu. Medema aiyetai-nadi Abamaduviviya ana sifi kabi'odi yadi abaveyao fa'ina himunumunudi. Kadu tovai-nadi tomuliya Yesu againe hi'ela higayo, “Yada tafalolo ana egana lobama ana tovenuwa'ata yana Abamaduviviya gilurveda'ufo. Ha'againe nuwanuwa ime anana Abamaduviviya a'ana anakidewedeweni-yo kana'a?”

<sup>13-14</sup> Au Yesu ana tomuliya adi'iselu gi'iveninisedi gigahedi gigayo, “Wanana Yelusalema ana melaleya ada kaliva gufa watuwavina gi'avalana-ma ginamaduhagami. Wanamuliyena be gava manuwa againe ginaluku, medede againe tonimanuwa wanagahena wanagayo, Tovehawala gigahe gigayo, Hadema vetawana Iya fa'ikuya uhawahegeni be Abamaduviviya a'ana aku tomuliya buye ana'ani? <sup>15</sup> Hidede amine

wanagahe tu vetawana lakahina manuwa getane ivi ahe hi'iyaveyavela-ma bana ginavehawalemi. Medede againe a'a wanakidewedewena ide fa'ideya.”

<sup>16</sup> Ada au tomuliya adi'iselu hilowoga be Yelusalema againe hina, ada Yesu gilukahihiyena amine hinuhagana. Au Abamaduviviya a'ana hikidewedewena.

<sup>17</sup> Mala gibogi Yesu yana yo'o tuwelo buye hiluku manuweya. <sup>18</sup> Ada hi'enolukekela hi'au'a tu Bana gigayo, “Gagahe velemo'ena mene kaliva sa'eyana agaimiya badi nibaikweyao agaidiya ginahawavemogataleku, bana buye ka'a'au'a-ma kalivai-nadi.”

<sup>19</sup> Au hi'ase'u'aulolo hivebutu sa'eyana sa'eyana hitoliluveluvena higayo, “Iya'eku ma ka'i keke?” Hidemi higahe.

<sup>20</sup> Yesu gigayo, “Kaliva sa'eyana omi yo'o tuwelo agaimiya bana a'a nau'a againe Iya buye a'utuvina kalivai-nadi. <sup>21</sup> Fa'ina Iya Tohobu'ela gana'alika Yaubada bonana eto'etoladina gigaheyena amine. Tu hoiyoi kaliva Iya Tohobu'ela nibaikweyao agaidiya ginahawavemogataleku amanadi! Bana vita lakahina ginanuhagana. Ka'i bana kalivai-nadi keke gidatubuga, medema gidalubodana fa'ina keke vita gidawahini.”

*Yesu sakalameni ana dewa giseyemaunena.*

*Madiu 26:26-30 Luke 22:14-20 1 Kolinita 11:23-25*

<sup>22</sup> Tu au ana toveya Yesu a'a givaina digo Yaubada againe givesiule gikihinena au ana tomuliya givededi gigayo, “Hida wowoku, au wavaini.”

<sup>23</sup> Ada gowa givaina digo givesiule givededi be moya'aidi hiyuyena. <sup>24</sup> Ada gigahedi gigayo, “Hida dayagiku gimadumadu-ma moya'aidi fa'idiya, higa Yaubada yana veyao omi agaimiya gisenama ana iya'iyaya. <sup>25</sup> Gagahe velemo'ena agaimiya hida babi ana oine aimo keke ganayu-havagileni tu tova mulina Yaubada yana avemwamwala ginasena ana toveya, oine ivaguna ganayuna. Mena abavemwamwalai-nadi badi yana itave'avina againe himimiyami-ma fa'idiya ginasena.” Hidedemi Yesu givenuwa'atadi.

<sup>26</sup> Ada au kwelidavadava hikweliyena. Hikweliyena gihavaina, hina oya Olive againe hilaka.

*Yesu Fita yana vekeke fa'ina gigaheye-vagahina.  
Madiu 26:31-35 Luke 22:31-34 Yoni 13:36-38*

<sup>27</sup> Tu Yesu gigahedi gigayo, “Omi moya'aimi wana'otayabuyabuku, fa'ina tuwai-mo'ena Yaubada bonana eto'etoladina gigahe gigayo, Sifi adi to'itave'avina ganamununa ada sifi hina'abinauna.

<sup>28</sup> Tu Yaubada ahe ginasivemididiku-yo Galili againe wai ganagona.”

<sup>29</sup> Au Fita gigahena gigayo, “Ka'i badi moya'aidi hina'otayabuyabu digo, iya keke gana'otayabuyabu.”

<sup>30</sup> Yesu gigayo, “Gagahe velemo'ena againiya, hidema bogi-nadi kamukamu keke ginakwage luhei tu nagona o unamidivekekeyeku tohiye.”

<sup>31</sup> Atu Fita gigahe toyogina gigayo, “Ka'i nuwanuwadi iya O buye hinaluve'alikada, au keke-mo'a ganavekekeye.” Ada tomuliya moya'aidi kadu hidede amine higahe.

*Yesu Gedasemani againe yana watagiya give'o'ola.*

*Madiu 26:36-46 Luke 22:39-46*

<sup>32</sup> Tu Yesu ana tomuliya buye hina abaga sa'eyana ana egana Gedasemani againe himiyami tu gigahedi gigayo, “Hidedei unahiyoto tu ganana ganave'o'ola.” <sup>33</sup> Ada Fita Yemesa Yoni buye ginawedi be hinavebwa'uliyena, au givebutu gi'ase'u'aulolo lakahina be givedivediwe. <sup>34</sup> Gigahedi gigayo, “Ga'ase'u'aulolo lakahina vaita yawaiku gida'alagolohini. Hidedei wanamiyami wanavanevanenega.”

<sup>35</sup> Au gina matalaviseya babiya gi'oduve'uve'umagigi, givebutu give'o'ola vaita ka'i ihayana be aulolo ana aituha keke gina'ayauneni. <sup>36</sup> Kadu gigayo, “Kama'ase'aseku, gaitoma moya'aina a tagalawalowa. Ka'i hida aulolo ana gowa udavaihegeni, tu keke yaku nuwanuwa au O'eni ya nuwanuwa amine unahuluva.”

<sup>37</sup> Ada giyewana ana tomuliya adi'itoto hidauda-ma gihagadi, ada Fita againe gigahe gigayo, “Saimoni, ka'i o udadauda? Bai sa'eyanaga ka'i keke afaiweya unavanevanenega? <sup>38</sup> Au

wanavanevanenega wanave'ove'o'ola be keke aladibidibi againe wanaluku. Ase'asemi gihawahegena tu wowomi gifwalele.” Hidedemi Yesu gigahe.

<sup>39</sup> Kadu tova anavelu gina give'o'ola-havagi yana ve'o'ola nagona amine. <sup>40</sup> Give'o'ola gihavaina, kadu giyewana badi hidauda-ma gihagadi matadi gineganega-mo'a fa'ina. Giluvagudi tu hiwowomumu fa'ina keke tamo gavadi hidagaheye.

<sup>41</sup> Kadu gina give'o'ola tova anaveto ada giyewana gigahedi gigayo, “Ka'i aimo wadadauda waveyaveyawai? Auwe'i. Tova a gilakayemu be Iya Tohobu'ela tokoyona nimadiya kaliva sa'eyana ginahawavemogataleku. <sup>42</sup> Wamidi be kana. Ake! Wa'ita, kaliva nibaikweyao agaidiya ginahawavemogataleku-ma a giyemu.”

*Yesu nibaineyao hikive'avina.*

*Madiu 26:47-56 Luke 22:47-53 Yoni 18:3-11*

<sup>43</sup> Ada aimo gigahegaheni Yudasi giyemu, bana Yesu ana yo'o tuwelo kalivana, kadu yo'o yadi wafeto yadi wafuluma buye'i, badi abaveyao ana tofaisewa kikaiwabudiyao kadu kaliva lakahidiyao hi'iveninisedi be hi'ela.

<sup>44</sup> Tu tohawavemogatala aituha yo'o boi giveledi gigayo, “Kaliva veyauga againe ganalusiuleyena-ma bana kalivai-nadi wanakive'avina be wanauwe-hagihagiyena.”

<sup>45</sup> Yudasi giyemu-yo auhe'ama Yesu againe gina veyaugeya gilusiuleyena gigayo, “Aku Tovehawala siule.” <sup>46</sup> Gigahe-yo yo'o Yesu

hikive'avina. <sup>47</sup> Tu kaliva sa'eyana Yesu liline gimidimidi-ma yana fetu lakahina gisiwakana digo abaveyao ana tofaisewa adi tokaiwabu ana agetoga gilauna tagana giluyo'ena.

<sup>48</sup> Ada Yesu yo'o gigahedi gigayo, “Vaita Iya tomunugakai'afu amine yo aku munuga fa'ina wa'ela wafetomiyao wafulumamiyao. <sup>49</sup> Tova tova manuwa-tafalolo lakahina againe Iya omi buye kamiyami gavehavehawala tu keke wadakive'aviku. Atu gavaimi tuwai-mo'ena Veyao Tuwaina ana buki Iya fa'ikuya gigahe, medema gidalakayemu velemo'ena.” <sup>50</sup> Yesu hidede amine gigahe-yo ana tomuliya moya'aidi hi'otayabuyabuna.

<sup>51-52</sup> Tu kwanatubulakahina sa'eyana Yesu gibwa'ubwa'ulina, ana vaigau kaleko kwayakwayana sa'eyanaga gi'osena. Ada kaliva tufoidi hikive'avina againe, ana kaleko kwayakwayana gimadulovena be konekonena gi'ota.

*Yesu miYuda yadi Koniselo agaidiya hinauwena.*

*Madiu 26:57-68 Luke 22:54-55,63-71 Yoni 18:12-14,19-24*

<sup>53</sup> Tu badi kaliva Yesu hikive'avina-ma abaveyao ana tofaisewa adi tokaiwabu againe hinauwena. Ada abaveyao ana tofaisewa kikaiwabudiyao moya'aidi kadu kaliva lakahidiyao kadu Mosese yana vehimeya ana tovehawala ahe hivaga'auta. <sup>54</sup> Bana Fita wai gimulina lauveya gi'ela, tokaiwabu yana

eda'awana-mo'ena againe giluku. Ada tuilala buye ali'auya hivetoga be ai givevevala.

<sup>55-56</sup> Tu abaveyao ana tofaisewa kikai-wabudiyao kadu miYuda yadi Koniselo moya'aidi togahe hileledi be higa Yesu hinahawavekoyoyeni-yo adifaiweya alikeya hinahegena. Togahe-kawowo moya'aidi hihawavekoyoyena tu yadi gahe tulina tulina. Au keke tamo hakwadi to'ita velemo'ena hidahagani.

<sup>57-58</sup> Ada kaliva tufoidi hitowamidi gahe-kawowo amine hihawavekoyoyena higayo, “Yana gahe anogalina gigayo, Hida Yaubada yana manuwu kaliva hiyogona-ma ganayawelina, ada aiyeta tohiye kanahegeni-yo au kadu velugana keke kaliva hinayogoni-ma ganakivemididina. Hidedemi gigahe ma anogalina.” <sup>59</sup> Atu kadu badi'iyao yadi gahe tulina tulina, keke gahe sa'eyanaga hidagaheyeni.

<sup>60</sup> Au abaveyao ana tofaisewa adi tokaiwabu tovedewayauga hinafadiya gitowamidi Yesu againe gigahe gigayo, “Ka'i bonalaufata keke afaiweya? Gavadi-yo hida kaliva yadi hawavekoyo keke udatani?” <sup>61</sup> Tu Yesu give'amata, keke tamo bonalaufata gidayakahini. Au tokaiwabu kadu gitoliyena gigayo, “Ka'i velemo'ena O Keliso Bana'e kadavadavana-ma Natuna, higa kaliva Yaubada givegidena be yada yo'o ginanagoyeda kalivai-nadi o ka'i keke?”

<sup>62</sup> Yesu gigayo, “Ika, Iya kalivai-kuna. Ada Iya Tohobu'ela abavetoga kikaiwabuna Tofaiwala-mo'a i'atagine ganahiyoto-ma wana'itaku. E, buhibuhi againe lobameya gana'ela'ela-ma wana'itaku.”

<sup>63-64</sup> Yesu hidede amine gigahe-yo abaveyao ana tofaisewa adi tokaiwabu ginuwakoyo, tauna ana vaigau gikaninina gigayo, “Auwe. Kaliva kadu velugadiyao yana dewa hinalukahihiyena-ma aimo keke kanaleledi. Yaubada gihawatagona ma a wanogalina. Gavaimi wanavehimeya?” Au moya'aidi hihawavekoyoyena higa vaita yana hawatagona fa'ina gida'alika. <sup>65</sup> Au tufoidi hivebutu Bana againe hikiwakiwala, ada magigina hikevana au hitutu'atugeni tu hihawavelaigena higayo, “Yoi! Hakwadi gimunumunu-ma mene u'ayauneni?” Ada tuilala hinauwedi be himunukoyokoyona.

*Fita Yesu givekekeyena.*

*Madiu 26:69-75 Luke 22:54-62 Yoni 18:15-18,25-27*

<sup>66-67</sup> Tu Fita gava melaleya gihiyoto tu abaveyao ana tofaisewa adi tokaiwabu ana agetoga kwamayoku sa'eyana gi'ela, ada Fita ai againe givevevala-ma gi'ita-yo gi'itakwanekwanena gigahena gigayo, “Kadu o'eni Yesu kwanaNasaledi buye wamiyami.”

<sup>68</sup> Atu bana givekeke gigayo, “Iya keke. Keke gadahalamane gavadi ugahegaheye.” Au gina yuwa abanauna againe ada kamukamu gikwage.

<sup>69</sup> Abanauna againe gimiyami tu bana agetogainadi gi'ita-yo au givebutu tolauboda agaidiya gigahe-havagi gigayo, “Hida hima kaliva au Yesu yana yo'o kalivana.”



<sup>70</sup> Atu Fita givekeke-havagi. Himiya kabisona tu badi tolauboda bana againe kadu higahe higayo, “Au makewa o'eni sa'eya agaidiya, fa'ina o kadu kwanaGalili.”

<sup>71</sup> Au Fita gigayo, “Ka'i keke gadagahe velemo'ena digo, Yaubada gidahawave'aviku. Bana kalivai-nadi wagaheyena-ma keke gadahalamaneni.”

<sup>72</sup> Gigahe-yo auhe'ama kamukamu gikwage-havagi. Ada Fita Yesu yana gahe nuwana gi'afolena gigayo, “Kamukamu keke ginakwage luhei tu nagona unamidivekekeyeku tohiye.” Au nuwana gi'afoleni tu givebutu gitagitagi.

## 15

*Failato Yesu givedewayaugina.*

*Madiu 27:1-2,11-14 Luke 23:1-5 Yoni 18:28-38*

<sup>1</sup> Tu mala gilauna abaveyao ana tofaisewa kikaiwabudiyao badi kaliva lakahidiyao kadu Mosese yana vehimeya ana tovehawala kadu miYuda yadi Koniselo velugadiyao hikovavaga'auhidi be buye hivevai. Ada au Yesu hiyogona be hinauwena tovehimeya kwanaLoma ana egana Failato againe hihege'aliyena.

<sup>2</sup> Ada Failato Yesu gitoliyena gigayo, “Ka'i miYuda yadi tokaiwabu O'eni?” Yesu gigayo, “Au ugahe amine Iya'eku.”

<sup>3</sup> Ada abaveyao ana tofaisewa kikaiwabudiyao gaitoma moya'aina fa'ina hihawavekoyoyena.

<sup>4</sup> Ada Failato gitolilualuva-havagi gigayo, “Ka'i keke tamo bonalaufata unagaheye? U'ita, yadi hawavekoyo gavadawana O againiya.”

<sup>5</sup> Atu yadi hawavekoyo fa'ina keke tamo bonalafata kadu gidagaheye. Hidema fa'ina Failato nuwana givegafo'uya'uya.

*Failato Yesu alika againe gihawahegena.*

*Madiu 27:15-26 Luke 23:13-25 Yoni 18:39-19:16*

<sup>6</sup> Tu tafalolo ana egana lobama ana tovenuwa'ata yana Abamaduviya ana toveya, Failato yana dewa ma yogoyogonina sa'eyana, ka'i hakwadi yo'o hive'ove'o'olena, medema giyauyauna. <sup>7</sup> Ada medema tova-inadi tovekwageya himiyami, boi tova sa'eyana hive'atalalakalaka be kaliva hiluve'alikadi. Ada tovekwageyai-dina agaidiya kaliva sa'eyana ana egana Balaba. <sup>8</sup> Au yo'o Failato againe hivaga'auta hivebutu hive'o'olena higayo, “Abamaduviya ana toveya kaliva uyauyaudi amine, tova adamoya kaliva sa'eyana unayauna.”

<sup>9</sup> Bana gigayo, “Ka'i nuwanuwami omi miYuda yami tokaiwabu ganayauna be agaimiya ganahawahegena?” <sup>10</sup> Fa'ina gihalamanena badi abaveyao ana tofaisewa kikaiwabudiyao yadi ga'uma'uma fa'ina bana againe hihege'aliyena. <sup>11</sup> Atu abaveyao ana tofaisewa yo'o hivagadonedo be Failato hinave'o'olena higa keke Yesu tu Balaba ginayauna.

<sup>12</sup> Au Failato gigahe-havagiledi gigayo, “Au Yesu againe gavaimi ganaga, Bana wavewagana ide miYuda yada tokaiwabu?”

<sup>13</sup> Badi kadu hikova-havagi higayo, “Kelose againe hinatutufosena.”

<sup>14</sup> Bana gigayo, “A! Gavadi yana koyona?” Tu badi kadu agodi gilakata-mo'a hikovakovadona higayo, “Kelose againe hinatutuvefosena.”

<sup>15</sup> Au Failato nuwanuwana yo'o nuwadi ginakiveyamumuna fa'ina, Balaba giyauna be agaidiya gihawahegena. Tu givehimeya be tolugaviya bulava hakahakaluluna againe Yesu hinalaulauna. Hilauna gihavaina, givehimeyedi be kelose againe hinatutuvefosena.

*Tolugaviya Yesu hihawavelaigena.*

*Madiu 27:27-31 Yoni 19:1-3*

<sup>16</sup> Ada tolugaviya Yesu hinauwena tovehimeya yana manuwa lakahina ana eda'awaneya hilukuwena, ada yadi yo'o moya'aidi hikovavaga'auhidi. <sup>17</sup> Ada aikeva likelikena tovehimeya adi vaigau amine hive'osena, ada badau bulava hakahakaluluna againe hi'etowaliwalina be u'une hisena. <sup>18</sup> Ada hivebutu hilusiuleyena higayo, “Siule siule miYuda yadi tokaiwabu.” <sup>19</sup> Ada aiwala hivaina be u'una hilaulauna, kadu hikiwakiwalitagona kadu Bana magigine tugadi hiveve'etodonena be higa vaita hinadavadavana. <sup>20</sup> Hihawavelaigena gihavaina, ana aikeva likelikena hivehalilina digo Tauna ana aikeva hive'osena ada hinauwena be kelose againe hinatutuvefosena.

*Yesu kelose againe hitutuvefosena.*

*Madiu 27:32-44 Luke 23:26-43 Yoni 19:17-24*

<sup>21</sup> Edeya hinauna tu kwanaSailini himaduhagana, ana egana Saimoni. Bana Alekisanida be Lufasi tamadi, ada wala'aiya

gitauya be Yelusalema againe ginauna. Au bana hikive'avina be higa Yesu ana kelose gina'avalana. <sup>22</sup> Ada abaga ana egana Goligota againe hi'aliyena. Goligota ana kaivila bonadeya ma utouto. <sup>23</sup> Hiyemu-yo oine mulamula ana egana mulo buye hivila'atutamo'ainama hitunena be ginayuni-yo yana aulolo ma'i gina'atagona. Atu Yesu gikilowena. <sup>24</sup> Ada kelose againe hitutuvefosena au kabala hihegelakahina be iya'iyaya higaheyena higa hakwadi hakwadi ana kaleko hinavaini ma hinahalamanena.

<sup>25</sup> Kauwana a givekuve'ine againe hikivekelosena. <sup>26</sup> Tu ana hawavekoyo ana fefe hi'etoladina be hisena. Etoladi gigayo, "Hidevama miYuda yadi tokaiwabu." <sup>27</sup> Kadu tomunugakai'afu luhei adi kelose againe hitutuvefosedi, sa'eyana Yesu i'atagine kadu sa'eyana i'imawane.

[ <sup>28</sup> Tomunugakai'afu Yesu buye hikivekelosedi fa'ina gavaimi Yaubada bonana ana to'awatalatalaina tuwai-mo'ena gigaheye-vagahina, medema a gilakayemu velema'ena gigayo,

Hinuwanuwa vaita Bana'e tokoyona adi loi kalivana.]

<sup>29-30</sup> Kaliva kelose againe hinauna-ma u'udi hilewalewana hihawaluvetonovena higayo, "Ahaiye! O ugahe vaita manuwatafalolo udayawelina be aiyeta tohiye againe kadu udakivemididina. Au Tauni udakibababale be kelose againe uda'etoyau."

<sup>31-32</sup> Meda anafaiweya abaveyao ana tofaisewa kikaiwabudiyao kadu Mosese yana

vehimeya ana tovehawala hihawavelaigena buye hive'agahegahe higayo, “Mali kaliva gikibababaledi tu Tauna keke anafaiweya ginakibababaleni. Ka'i O'eni velemo'ena Yaubada yana Tovegida ide miYuda yada tokaiwabu amanadi, au adamoya kelose againe auhe'ama udahobu be ime ana'ita-yo anadava.” Hidedemi miYuda adi tonagona hihawavelaigena, ada kadu badi Bana buye kelose againe hitutufosedi-ma hivebutu hihawaluvetonovena.

*Yesu gi'alika.*

*Madiu 27:45-56 Luke 23:44-49 Yoni 19:28-30*

<sup>33</sup> Kauwana getadiya tu umalovana babi matatabuna gi'uyuyubodena be ginunauwena mala gilavina againe. <sup>34</sup> Au mala gilavina Yesu gikova'awafatafata gigayo, “Elai Elai lama sabakitani?” “Ho yaku Yaubada yaku Yaubada, gavana fa'ina unuyabuyabuku?” Bonana ana kaivila au hidede amine.

<sup>35</sup> Ada tolauboda tufoidi hinogalini-yo higayo, “Wanogali, Yaubada bonana ana to'awatalatalaina Elaiya fa'ine gikovakova.”

<sup>36</sup> Ada kaliva sa'eyana gimadu balou givaina digo oine golagolana againe gi'utuvina ai againe gi'etokwanena ada gitunena be higa ginayuna, ada gigayo, “Kanaboda be kana'itana, ka'i Elaiya gina'ela be gina'etoyauna o ka'i keke.”

<sup>37</sup> Tu Yesu gikova'awafatafata-yo yawaina gihavaina. <sup>38</sup> Gi'alika-yo manuwa-tafalolo vetawana-tabu ana abaseboda kaleko gi'ahailugana be higa vaita abaluku Yaubada

againa gi'ayauna. <sup>39</sup> Tu tolugaviya adi togiyomatana Yesu magigine gihaga-ma yana kova ginogalina ada gavaiya'amine gi'alika ma gi'itana againa, gigahe gigayo, “Wona velemona hida hima kaliva Yaubada Natuna.”

<sup>40</sup> Kadu vevine tufoidi himidilauva be hilulauboda. Badi agaidiya sa'eyana Meli vineMagidala, sa'eyadi Meli Yemesa kabi'o be Yosese hinadi, kadu sa'eyadi Salome. <sup>41</sup> Boi Yesu Galili ana fafaliya gimiyami ana toveya badi vevine-dina hibwa'ulina be tova moya'aina hi'ita'itave'avina. Kadu vevine velugadiyao moya'aidi Yelusalema againa Bana buye hi'ela-ma kadu hilulauboda.

*Yesu tomohuyehuyeya hihuyana.*

*Madiu 27:57-61 Luke 23:50-56 Yoni 19:38-42*

<sup>42-43</sup> Mala gisilavina tu Yosefa kwana Alamadiya giyemu. Bana kaliva kikaiwabuna miYuda yadi Koniselo agaidiya, ada kadu bana tauna Yaubada yana aituha ginalakayemu fa'ina gilulauboda, higa kaliva yana itave'avina againa hinamiyami be ase'asediya ginavehivehimeya. Ada medema tovai-nadi Abamaduviviya ana kidewadewa ana tova higa bogiyadi sabati. Hidema fa'ina Yosefa gi'asevatu be gina Failato againa giluku Yesu wowona fa'ina give'o'ola. <sup>44</sup> Ada Failato Yesu ahe gi'alika ma ginogalina againa nuwana givegafo'uya'uya. Au tolugaviya adi togiyomatana giyowanina be gi'ela gitoliyena ka'i Yesu ahe gi'alika o ka'i keke. <sup>45</sup> Bana tonagona givenuwa'atana higa vaita a gi'alika, au Yesu wowona Yosefa againa gihawahegena. <sup>46</sup> Au

---

**15:41:** Sam 22:1 Sam 69:21 Yem 26:31-33, Hi 10:19-20      **15:41:**  
Lu 8:2-3

Yosefa gina kaleko kwayakwayana gikimoneni-yo gina wowona gikakilina, kalekoya gifafana be tomohuyahuya kuga hinagene giyalana-ma againe giselukuwena. Ada au kabala lakahina againe tomohuyahuya ana eda'awana give'enobodana. <sup>47</sup> Meli vineMagidala kadu Meli Yosese hinana hai wowona gihuyana-ma hi'itana.

## 16

*Yesu gimididi-havagi.*

*Madiu 28:1-10 Luke 24:1-12 Yoni 20:1-10*

<sup>1</sup> Tu sabati, higa Satadei, a hihegena tu Meli vineMagidala kadu Meli Yemesa hinana kadu Salome hina vanedimodimo hikimonena be hinana Yesu wowona hinabunamina. <sup>2</sup> Au tafaloloya kauwana giyemuna-mo'a ma hilowoga be hina tomohuyehuyeya. <sup>3</sup> Edeya hinauna tu buye hive'agahegahe higayo, “Hakwadi kabala tomohuyahuya ana eda'awana gi'enobodana-ma ginave'awawani ide fa'ideya?”

<sup>4</sup> Mena kabalai-nadi ma lakahi-mo'ena. Tu hi'italele againe, tamo hakwadi kabala give'awawana ma hi'itana. <sup>5</sup> Au tomohuyehuyeya hiluku-yo kwanatubulakahina sa'eyana hi'itana, vaigau kwayakwayana gi'osena ada tomohuyahuya i'atagine gihiyoto. Hi'ita-yo ase'asedi gi'akolukoluna.

<sup>6</sup> Bana gigahedi gigayo, “Keke wanamatauta. A gahalamanena Yesu kwanaNasaledi hikivekelosena-ma walelelena. Keke hidede againe gidamiyami, au gimididi-havagi. Wa'ela be abaga hisena-ma wa'ita. <sup>7</sup> Wana'ita-yo au wanamaduna ana tomuliya Fita buye

wanagahedi wanagayo, Yesu Galili againe wai ginagona yuwadedei wana'itana boi gigaheyena amine.”

<sup>8</sup> Au vevine himadulowoga tomo-huyahuya hi'otayabuyabuna, fa'ina ase'asedi gi'akolukoluna kadu hivetatava. Ada himatauta fa'ina, keke tamo hakwadi hidavenuwa'atani.

*Yesu Meli vineMagidala againe Tauna gi'ivemogatalina.*

*Madiu 28:9-10 Yoni 20:11-18*

[<sup>9</sup>Tu mala gilauna tafaloloya Yesu ahe gimididi-havagi yo Meli vineMagidala againe Tauna gimidi'ivemogatalina. Bana Meli-nadi boi yafune seveni hiluvaiyena tu Yesu giwavidi. <sup>10-11</sup> Au Meli gina be badi boi Yesu buye himiyami-ma givenuwa'atadi. Badi yadi wanuwavita hitagitagi tu givenuwa'atadi gigayo, “Yesu yawayawana gimimiyami. Iya tauku ga'itana.” Tu yana gahe keke hidavetumaganeni.

*Yesu edeya gilakayemu tomuliya adi'iselu agaidiya.*

*Luke 24:13-35*

<sup>12</sup> Muliya Yesu ana ita tulina amine tomuliya adi'iselu agaidiya giyemu. Badi melala kabi'ona wala'aiya hinauna tu Yesu badi agaidiya Tauna gi'ivemogatalina. <sup>13</sup> Au Yelusalema againe hiye-wadi be tomuliya velugadiyao hivenuwa'atadi tu badi yadi gahe keke hidavetumaganeni.

*Yesu yana yo'o ileveni agaidiya gilakayemu.*

*Madiu 28:16-20 Luke 24:36-49 Yoni 20:19-23 Afositolo 1:6-8*



<sup>14</sup> Muliya-mo'ane yana yo'o ileveni hi'au'a tu badi agaidiya Tauna gi'ivemogatalina. Ada gidakeyedi yadi vetumagana keke kadu tagadi gikulu fa'ina, badi ahe gimididi-havagi yo hi'itana-ma yadi gahe keke hidavetumaganeni. Hidema fa'ina gidakeyedi.

<sup>15</sup> Kadu gigahedi gigayo, “Fafali moya'aina agaidiya wanana be kibababala ana Venuwa'ata Yamumuna kaliva moya'aidi agaidiya wanalulumamalena. <sup>16</sup> Gava kaliva ginavetumaganeku-yo ginabafitaiso, medema kibababala ginanuhagana. Atu gava kaliva keke ginavetumaganeku, medema aimo matahiwadi ginanuhagana. <sup>17-18</sup> Ada badi hivetumaganeku-ma faiwala ana iya'iyaya hidede amine hinaseyemaunena. Aku eganeya yafune hinawaviwavidu, meya tulina tulina agaidiya hinalulukahihi. Ka'i oloto hinasilakahina o ka'i gufa laulaugina hinayuna digo, keke hinabwavi. Nimadi to'aulolo agaidiya hinaseni-yo hinayamumu. Vetumagana ana iya'iyaya au hidede amine.”

*Yesu lobameya gilaka.*

*Luke 24:50-53 Afositolo 1:9-11*

<sup>19</sup> Tu Kaiwabu Yesu ana tomuliya agaidiya gi-gahe gihavaina, Yaubada lobameya gisilakahina ada abavetoga kikaiwabuna Yaubada i'atagine gi-hiyoto. <sup>20</sup> Badi tomuliya ma hitauya fafali tulina tulina agaidiya hilumamala, ada Kaiwabu gifai-walaveledi be aituha fifiwalana hififaisewani-

yo kaliva yadi laumamala fa'ina higahe higayo,  
“Velemodi.” Au hidede amine.]

**Yaubada Bonana Veyao Ivaguna Bona  
Iduna  
The New Testament in the Iduna Language of Papua  
New Guinea  
Nupela Testamen long tokples Iduna long Niugini**

copyright © 1983, 2003 Wycliffe Bible Translators, Inc.

Language: Iduna

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-26

---

PDF generated using Haiola and XeLaTeX on 11 Nov 2022 from source files dated 22 Nov 2019

73458371-ad55-5c77-8b6b-5eca8d58f667